

《三指禅》脉法

清·周学霆

总 论

医理无穷，脉学难晓，会心人一旦豁然，全凭禅悟。余未及冠，因病弃儒，留心医学，研究诸书，并无一字之师，独于脉，稍得异人指示，提一缓字，而融会之，全身脉证，于瞬息间，尽归三指之下。距今四十余年，所过通都大邑，探取病情，无一不验。今不敢以自私，立为主脑，对以阴阳，注释多本古人体裁，实非臆造，就正同学，幸其教我。

脉 学 源 流

轩辕使伶伦截嶰谷之竹，作黄钟律管，以候天地之节气。使岐伯取气口，作脉以候人之动气。黄钟之数九分，气口之数亦九分，律管具而寸之数始形。故脉之动也，阳浮九分，阴得一寸，合于黄钟。黄钟者，气之先兆，能测天地之节候。气口者，脉之要会，能知人命之死生。本律管以定脉，轩岐之微蕴，诚有未易窥测者。越人著《难经》，推明十变。叔和撰《脉经》，演成十卷，而脉始得灿明于世。迄五代高阳生《脉诀》出，士大夫多议之，由是才人杰士，咸驰骤于笔墨之间，各据其理，各抒其见，而真诀几几乎晦矣。齐褚澄论脉，女子阴逆，自上生下，左寸为受命之根，心肺脉诊于两尺，倒装五脏，谬妄已极。赵维宗论脉，心肺

在上，为浮为阳。肝肾在下，为沉为阴。脾居中州，半浮半沉，半阴半阳。意义肤浅，更属无稽。吴草庐宗《内经》，取之于气口，未尽《内经》之奥。朱考亭推《内经》，求之于遍身，未达《内经》之专。若二李者，频湖、士材，将前人所流传之脉，依样画葫芦，演成诗句，字字晓畅。叔和而后，幸有传人，究未得平脉诀，医无权度，殊失《内经》以平人定脉之旨。是编揆之前哲，虽则别开生面，实亦不过发明《内经》及《难经》、《脉经》之义云尔。

定脉部位

晦庵朱子跋郭长阳医书云：“予尝谓古人之于脉，其察之固非一道矣。然今世通行，惟寸关尺之法为最要，且其说具于《难经》之首篇，则亦非凭空结撰也。故郭公此书，备载其语，而并取丁德用密排三指之法以释之。夫《难经》蔓乎尚已，至于丁德用之法，余窃意诊者之指有肥瘠，病者之臂有长短，是以相求，或未为定论也。盖尝考《经》之所以分尺寸者，皆自关而前却是。则所谓关者，必有一定之处，亦若鱼际，尺泽之可以外见而先识也。然考诸书，皆无定论，惟《千金方》内，以为寸口之处，其骨自高，而关尺由是而却取焉。则其言之先后，位之进退，若与经文相合。独俗间所传《脉诀》，五七韵语，其词浅陋，非叔和本书明甚，乃能直指高骨为关，而分其前后，以为尺寸阴阳之位，似得《难经》本旨。余非精于道者，不能有以正也，姑附于此，以俟明者而折衷焉。”按《内经》十八卷，即三坟古书，既未经孔子删定，复未经朱子集注，医喙争鸣，互相排诋，

分门别户，莫知适从。独指高骨为关，以定尺寸，得朱子之跋，而脉之部位始得其准。

尺 寸 解

高骨为关，从关至鱼际得一寸，脉浮九分，而寸以名。从关至尺泽得一尺，脉浮一寸，而尺以名，以关为间隔，而尺寸不得混为一家。合寸关尺为三部，其解最为直捷，不得曲为分晰。

六 部 脉 解

六部之脉，候之寸关尺，出于《脉要精微篇》。左寸以候心，左关以候肝，左尺以候肾。右寸以候肺，右关以候脾，右尺以候命门，以明六部各有所属。究之候脉，分而不分，不分而分，则得诀矣。

《脉经》曰：“春弦夏洪秋似毛，冬石依经分节气。婀娜缓若春杨柳，此是脾家居四季”。假如春脉弦，岂有肝脉弦而余脉不弦之理乎？弦则俱弦，不过言春乃肝气主事，非谓独候之左关。但得浮洪，即属心火，不必定拘左寸。但得短涩，即属肺金，不必定拘右寸。但得沉细，即属肾水，不必定拘左尺。但得和缓，即属脾土，不必定拘右关。五脏之脉分，五脏之部不分也。

是以伤寒之脉，仲景一书曰浮、曰紧、曰长、曰弦、曰沉、曰微、曰伏、曰代，但统分脉之浮、紧、长、弦、沉、微、伏、代，并未专指何经。

内伤之脉，叔和一书，失血宜沉细，不宜浮紧，水症宜浮大，不宜沉伏。上气宜浮滑，不宜沉数。腹痛宜沉伏，不宜浮洪。消渴宜数大，不宜虚细。咳嗽宜浮缓，不宜细数。但分脉之宜与不宜，亦不必辨其何脏，此其明白可证者也。

要须知先天一点真阳之火，潜于水中，寄居两尺，在右火用事，水为之涵。火生土，是为脾土，居右关。土生金，居右寸。在左水用事，火为之温。水生木，是为肝木，居左关。木生火，是为心火，居左寸。自无而生有，由下而生上，各有其位而不可易者。《难经》曰：“取寸口以诀五脏六腑之死生吉凶。”寸口者，手太阴之动脉。《内经》曰：心脉满大，病癰筋挛。肝脉小急，病癰筋挛。肾脉小急，肝脉小急，心脉小急，不鼓皆为瘕。肾肝并沉为石水，并浮为风水。“此又于部分之间，而别有会心者，分而不分，不分而分，神而明之，存乎其人”。

【解】

脉分六部——分而不分，不分而分：

四时之候——五脏之脉分，五脏之部不分：春脉弦，六部皆弦。

伤寒、内伤证之脉——分脉之宜与不宜，不辨其何脏：失血宜沉细，不宜浮紧，指六部而言，并不辨脏腑分部，但亦有两部并看者：肝肾。

真阳之火——潜水中，寄居两尺：

右——火，水为涵。火生土：脾→右关，土生金→右寸：肺。

左——水，火为温。水生木：肝→左关，木生火→左寸：心。


左心膻中肝胆肾小肠 右肺胸中脾胃命大肠

辨

天下之理，有不必辨者。有必欲辨者，不必辨而辨，则其理晦。必欲辨而不辨，则其理亦晦。

心与小肠相表里，肝与胆相表里，肾与膀胱相表里，肺与大肠相表里，脾与胃相表里，形质既已相配，气脉自然相通。而以为大小肠之在下，不得候之于上，相为表里则可，同居其部则不可。易为左心膻中肝胆肾小肠，右肺胸中脾胃命大肠。亦思气类相感，有不见其端倪者。琥珀拾芥，悬空亦起。磁石吸铁，隔碍潜通。而何论大小肠之在下，心肺之在上也乎？且胸中膻中，间不能寸，小肠丙火，何得与肾水同居，大肠庚金，何得与命门同宿乎？此则不必为之穿凿而辨者也。而有不得不辨者，左肾以藏水，右肾以藏火，既已力辨其非，何以两肾俱藏水，列诸左右，独候之左尺，有是理乎？不知两肾皆藏水，即皆藏火，不过左以水为主，右以火为主耳。吾为之正其名曰：左心小肠肝胆肾膀胱，右肺大肠脾胃肾命门。

【解】



定至数

持脉之初，先看至数。欲知至数，先平己之呼吸，以己之呼吸，定人之呼吸，未尝不同。盖人之五脏不可见，所可见者，脉而已。呼出于心肺，心一至，肺一至。吸入于肝肾，肝一至，肾一至。一呼一吸，脉来四至，名一息。脾脉不见者，以土旺于四季也。是为平脉。惟是邪扰于中，斯脉不得其正耳。亦有平人脉来五至而无病者。

二十七脉名目

缓	浮沉 迟数	微细	弦弱	濡牢
		虚实	滑涩	洪伏
		长短	芤革	结促
			紧散	动代

诀以缓为极平脉，余二十六为病脉。定清缓脉，方可定诸病脉。精熟缓脉，即可以知诸病脉。脉之有缓，犹权度有定平星也。

缓（和缓也，张太素曰：“应指和缓，往来甚匀”。杨元操曰：“如初春杨柳舞风之象。”）

四至调和百脉通，浑涵元气此身中。

消融宿疾千般苦，保合先天一点红。

露颗圆匀宜夜月，柳条摇曳趁春风。

欲求极好为权度，缓字医家第一功。

不浮不沉，恰在中取。不迟不数，正好四至。欣欣然，

悠悠然，洋洋然，从容柔顺，圆净分明。微于缓者，即为微。细于缓者，即为细。虚实长短，弦弱滑涩，无不皆然。至于芤革紧散、濡牢洪伏、促结动代，以缓为权度，尤为显而易见者也。

有胃气生

四时之脉，和缓为宗，缓即为有胃气也。万物皆生于土，久病而稍带一缓字，是为有胃气，其生可预卜耳（统六脉而言，不得独诊右关）。

脉贵有神

无病之脉，不求神而神在，缓即为有神也。方书乃以有力训之，岂知有力，未必遂为有神，而有神正不定在有力，精熟缓字，自知所别裁。

读缓字法

焚香趺坐，静气凝神，将缓字口诵之，心维之，手摩之，反复而详玩之，久之，缓归指上，以此权度诸脉，了如指掌。

【解】

二十七脉中——缓为平脉，余为病脉。

缓——不浮不沉：在中取。

不迟不数：四至。

从容柔顺，圆净分明。

缓——权度诸病脉之标

缓——即有胃气。

缓——即有神。

四时平脉

天地之气，分寄四时，化生万物。故春木、夏火、秋金、冬水，皆乘其令以分司，独土则通旺于四季。分阴分阳，迭用柔刚，盖言平也。人得天地之气以生，而脉即与之为比附。春为肝木，脉弦。夏为心火，脉洪。秋为肺金，脉毛。冬为肾水，脉石。惟胃气属土，其脉从容和缓，散布于弦洪毛石，以默运于春夏秋冬，浑沦元气，流畅贯通，生生不已，平孰甚焉。

如春肝宜弦，弦而缓者，若风飏柳梢，抑扬婉转。夏心宜洪，洪而缓者，若活火烹茶，薰灼舒徐。秋肺宜毛，毛而缓者，若拣金砂砾，渐次披搜。冬肾宜石，石而缓者，若水泽腹坚，徐形绉透。四季脾胃用事，厥脉宜缓，不问可知，此平脉所以获生也。

盖平者，和也，所以和其脉，使无急躁也。平者，准也，所以准其脉，使无偏胜也。以缓平之，而后四时之脉，得其平耳。夫缓即胃气，原秉天生地成，与诸脉互相主辅，而不可须臾离焉者，《经》所云春弦、夏洪、秋毛、冬石，皆以胃气为本，诚得诊脉之大宗也。惜医不知察，囫圇读过，毫无心得。未知有胃气者，为平为生。无胃气者，为病为死。遂使一成不易之理，徒蓄千载莫破之疑。余因揭而论定，以著是编。

【解】

天地之气——天气与地气：先天与后天之气。

缓——胃气，秉天地之气而成。

缓——胃气分寄四时脉气，四时脉气皆以胃气为本

浮沉迟数四大纲

立缓为标，言平脉，即统该乎弦洪毛石。提病脉，先分著于浮数迟沉。而二十二脉之旁见侧出者，无不寓于其中，举其纲而目自见。

浮（《脉经》曰：“举之有余，按之不足”。崔氏曰：“如水上漂木，主表。”）

浮从水面悟轻舟，总被风寒先痛头。

里病而浮精血脱，药非无效病难瘳。

浮紧伤寒，浮虚伤暑，浮数伤风，浮迟伤湿，亦有里病而浮者。浮而云腾蜃起，多属阴虚。浮而绵软葱空，半由失血。浮而月荡星摇，预知精败。浮而羽铍毛散，可卜神消。

沉（《脉经》曰：“重手按至筋骨乃得”，杨氏曰：“如石沉水底，主里。”）

沉居筋骨有无病，着骨推筋仔细摩。

有病而沉兼别脉，沉而无病世人多。

沉迟痼冷，沉数内热，沉滑痰积，沉紧冷痛，多有无病脉沉者。沉居命脉悠长，足徵寿考。沉居肾脉恬静，咸颂仁人。沉居关脉调匀，允称秀士。沉居寸脉圆活，定是名姝。

迟（《脉经》曰：“一息三至，去来极慢”。迟为阳不胜阴，脉来不及。）

迟惟三至欲亡阳，好与医家仔细详。

总是沉寒侵脏腑，只宜温药不宜凉。

浮迟表寒，沉迟里寒，无力虚寒，未有无寒脉迟者。迟

为内病壅阏，温养阳刚。迟为外病浸凌，温消阴翳。迟为缓病缠绵，温补元气。迟为急病驰骤，温散客邪。

数（《脉经》曰：“一息常数六至。”《素问》曰：“脉流薄疾”，数为阴不胜阳。）

数脉为阳至倍三，脉中数脉实难谳。

而今始识诸般数，嘱咐医人莫乱探。

五行之中，金木水土，各居其一，惟火有二。而推其火之类，不特本经之火。海枯被火，则为肾火。榆能生火，则为肝火。石可取火，则为肺火。壤内藏火，则为脾火。不止有二，而有六矣。而充其火之尽，不特当时之火。风热而炽，则为风火。寒郁而热，则为寒火。暑伤而温，则为暑火。湿积而蒸，则为湿火。燥过而枯，则为燥火。是内有六，外亦有六矣。而穷其火之变，不独五运六气之火，又有无根之火，痰结之火，血燥之火，莫可名状，莫可纪极之火。

综此以观，无病不有火，无火不脉数，无药不可以治数。君火而数，芩连固为折火之正敌。相火而数，桂附亦为归火之灵丹。脾倦生火，数非参芪莫疗。肝盛生火，数惟柴芍可除。数缘肾虚，两地滋阴，不必降火。数由肺损，二冬泄热，即以清金。解痰火之数，惟持法夏。润血燥之数，须用当归。伤风发热，可以去风，即可以治数，防风、羌活。伤寒发热，于焉去寒，即于焉治数，麻黄、桂枝疗暑热之数脉，焦术、川乌，极为妙品。调湿热之数脉，苍术、黄柏，实有神功。阿胶养秋燥之金，脉数自减。元参泄无根之火，脉数以除。

区别内外，分析经络，以脉证病，斯得之矣，安得有心

人，与之谈数脉哉。

【解】

脉之四大纲——浮沉迟数

表证：浮 — 紧——寒
 虚——暑
 数——风
 迟——湿

里证：浮 — 无力——阴虚
 芤——失血
 动摇——精败
 虚散乱——神亡

沉 — 迟——痼冷
 数——内热
 滑——痰
 紧——冷

无病：沉 — 右尺悠长——长寿
 肾——仁
 关——秀士
 寸——名姝

迟 — 浮——表寒
 沉——里寒
 有力——积寒
 无力——虚寒

迟 — 水滞——温阳
 寒郁——消阴
 久病——温元
 急病——散邪

数：火——

- 君火——苓连
- 相火——桂附
- 脾火——参芪
- 肝火——柴芍
- 肾虚——两地
- 肺火——二冬
- 痰火——法夏
- 血燥——当归
- 伤风——羌防
- 伤寒——麻桂
- 暑热——焦术、川乌
- 湿热——苍术、黄柏
- 秋燥——阿胶
- 无根火——元参

对待总论

人之一身，不离阴阳。而见之于脉，亦不离阴阳，浮沉迟数，阴阳相配之大者也，举其余而对待训之。事以相形而易明，理以对勘而互见。

微与细对

微为阳弱欲绝，细乃阴虚至极，二脉实医家剖别阴阳关键，最宜分晓，故继浮沉迟数后，举以为对，以冠诸脉。

微 微脉有如无，难容一呼吸。

阳微将欲绝，峻补莫踟蹰。

(轻诊犹见，重按全无。黄芪白术，益气归元。附片干姜，回阳反本。)

细 细脉一丝牵，余音不绝然。

真阴将失守，加数断难痊。

（举之极微，按之不绝。天麦二冬，清金生水。生熟两地，滋阴养阳。）

虚与实对

二脉举按皆得，而刚柔异质。实为邪气实，虚乃本气虚。

虚 虚脉大而松，迟柔力少充。

多因伤暑毒，亦或血虚空。

（迟大而软，按之无力。按《脉经》言“隐指豁空”，非是。诸脉中，惟芤革二脉言空，以虚脉而言空，能别乎革，难别乎芤。濒湖曰：“脉虚身热，为伤暑，亦主血虚。”）

实 实脉大而圆，依稀隐带弦。

三焦由热郁，夜静语犹颠。

（浮沉皆得，长大带弦。按《脉经》言：“应指愔愔然”，非是。愔愔，坚实貌，乃牢紧脉，非实脉也。伤寒胃实谵语，或伤食气痛。）

长与短对

寸关尺为脉本位，长则过乎本位，短则不及本位。欲辨长短，先明本位。

长 长脉怕绳牵，柔和乃十全。

迢迢过本位，气理病将痊。

（按：长而牵绳，阳明热郁。长而柔和，病将解矣。朱氏曰：“不大不少，迢迢自君”，言平脉也。《经》曰：“心脉长，神强气壮。肾脉长，蒂固根深”。）

短 短脉部无余，犹疑动宛如。

酒伤神欲散，食宿气难舒。

（按：短与动为邻，形与动实别。动则圆转如豆，短则濡滞而艰。濒湖曰：“短而滑数酒伤神”，杨氏曰：“短脉为阴中伏阳，三焦气壅，宿食不消。”）

弦与弱对

脉而弦，脉之有力者也，雄姿猛态，可以举百钩。脉而弱，脉之无力也。纤质柔弱，不能举一羽。

（同一弦也，在肝经则泻之，攻之。在胆经则和之解之。）

弦

弦脉似张弓，肝经并胆宫。

疝癰癥瘕，象与伤寒同。

（《素问》曰：“脉端直以长”，《刊误》曰：“从中直过，挺然指下”，按弦属肝胆经，疝癰癥瘕，肝胆经病。肝胆经有泄无补。）

弱

弱脉按来柔，柔沉不见浮。

形枯精自减，急治可全瘳。

（《脉经》曰：极软而沉，按之乃得，举手无有。“弱宜分滑涩。脉弱以滑，是有胃气，清秀人多有此脉，脉弱而涩，是为病脉。”）

滑与涩对

脉之往来，一则流利，一则艰滞，滑涩形状，对面看来便见。

滑

滑脉走如珠，往来极流利。

气虚多生痰，女得反为吉。

（沈薇垣曰：“滑主痰饮，浮滑风痰，沉滑食痰，滑数痰火。亦有呕吐、蓄血、宿食而脉滑者。”万氏云“脉尺数关

滑而寸盛，为有胎。”)

涩 涩脉往来艰，参差应指端。
只缘精血少，时热或纯寒。

(《脉经》云：“涩脉细而迟，往来艰，短而散，或一止复来。”《素问》云：“参伍不调”。按血不流通，故脉往来艰滞。)

芤与革对

同一中空，而虚实分焉，虚而空者为芤，实而空者为革。悟透实与虚，旁通芤与革。

芤 芤字训慈葱，中央总是空。
医家持拟脉，血脱满江红。

(戴同父曰：“营行脉中，脉与血为形，芤脉中空，血脱之象也。”)

革 革脉惟旁实，形同按鼓皮。
劳伤神恍惚，梦破五更遗。

(按：革主亡精，芤主亡血。《脉经》言均为失血之候，混淆莫别。不过革亦有亡血者。)

紧与散对

松紧聚散，物理之常。散即松之极者也。紧即聚之极者也，紧如转索，散似飞花。紧散相反，形容如生。

紧 紧脉弹人手，形如转索然。
热为寒所束，温散药居先。

(诸紧为寒为痛。人迎紧甚，伤于寒。气口紧甚，伤于食。腹痛尺紧，中恶浮紧，咳嗽沉紧，皆主死症。按浮紧宜散，沉紧宜温)。

散 散脉最难医，本离少所依。

往来至无定，一片杨花飞。

（柳氏云：无统纪，无拘束，至数不齐，或来多去少，或去多来少，涣散不收。）

濡与牢对

浮之轻者为濡，平沙面雨霏千点。沉之重者为牢，锦匣里绵裹一针。

濡

濡脉按须轻，浮萍水面生。

平人多损寿，莫作病人评。

（《脉经》曰：“濡脉极软而浮，如棉在水中，轻手乃得，按之无有”。按：濡主血虚之病，又主伤湿，平人不宜见此脉。濒湖曰：“平人若见似无根。”）

牢

牢脉实而坚，常居沉伏边。

疝癰犹可治，失血命难延。

（《脉经》曰：“似沉似伏，实大弦长。”仲景曰：“寒则牢坚，有牢固之象”。按牢长属肝，疝癰肝病，实病见实脉，可治。扁鹊曰：“失血脉，脉宜沉细，反浮大而牢者，死。”虚病见实脉也。）

洪与伏对

浮之最著者为洪，水面上波翻浪涌。沉之至隐者为伏，石脚下迹遁踪潜。

洪

洪脉胀兼呕，阴虚火上浮。

应是惟夏月，来盛去悠悠。

（《经》曰：“诸腹胀大，皆属于热”。呕初起为寒，郁则为热。《经》曰：“诸逆上冲，皆属于火。”阴虚阳盛，脉多洪，惟夏日应时。濒湖曰：“拍拍而浮是洪脉。”《素问》曰：“来盛去衰”。）

伏 伏脉症宜分，伤寒酿汗深。

浮沉俱不得，著骨始能寻。

（伤寒一手伏，曰单伏，两手伏，曰双伏。乃火邪内郁，不得发越，阳极似阴，故脉伏，必大汗而解。又有夹阴伤寒，先有伏阴在内，外复感寒，阴盛阳衰，四肢厥逆，六脉沉伏，须投姜附，灸关元，脉乃出。按：二症极宜分。）

结与促对

迟而一止为结，数而一止为促。迟为寒结，则寒之极矣。数为热促，则热之极矣。

结 结脉迟中止，阳微一片寒。

诸般阴积症，温补或平安。

（越人曰：“结甚则积甚，结微则积微。浮结内有积病，沉结内有积聚。”）

促 促脉形同数，须从一止看。

阴衰阳独甚，泄热只宜寒。

（濒湖曰：“三焦郁火炎炎盛，进必无生退有生”。按：促只宜泄热除蒸，误用温补，立见危殆。）

动与代对

动则独胜为阳，代则中止为阴。动代变迁，阴阳迭见。

动 动脉阴阳搏，专司痛与惊。

当关一豆转，尺寸不分明。

（《脉经》曰：“动乃数脉见于关，上下无头无尾，如豆大，厥厥动摇。”仲景曰：“阴阳相搏名曰动。阳动则汗出，阴动则发热”。濒湖曰：“动脉专司痛与惊，汗因阳动热因阴。”）

代 代脉动中看，迟迟止复还。

平人多不利，惟有养胎间。

（结促止无常数，或二动一止，或三五动一止，即来。代脉之止有常数，必依数而止，还入尺中，良久方来。滑伯仁曰：“若无病羸瘦，脉代者危”，有病而气不能续者，代为病脉。伤寒心悸脉代者，复脉汤主之。妊娠脉代者，其胎百日。代之生死，不可不辨。）

【解】

微——轻诊见，重诊无：阳弱欲绝
细——举之微，按之不绝：阴虚极

——阴阳

虚——迟大无力：本气虚
实——浮沉皆长大弦：邪气实

——本标

长——过本位：神强
短——不及本位：阴中伏阳

——伸伏

弦——直长：肝胆病
弱——软沉，按之得，举之无

——强弱

滑——流利如珠：痰饮
涩——艰滞细迟：精血衰

——痰饮，精衰

芤——中空：血脱，虚
革——中空旁实，实

——虚实

紧——弹手，如转索：寒
散——涣散不收，无束：本离

——固散

濡——软而浮：血虚
牢——实坚：寒

——虚寒

洪——浮甚如波：火
伏——沉隐：火邪内郁

——火：伸郁

结——迟而一止：寒极	}—寒热
促——数而一止：热极	
动——数见于关：阴阳搏，阳	}—阴阳
代——止有常数：阴	

奇经八脉

本来督任一身中，寻得仙源有路通。

剖别阴阳维跷界，调冲运带鼎炉红。

八脉者，督脉、任脉、阳维、阴维、阳跷、阴跷、冲脉、带脉是也。以其不拘于经，故曰奇。督任冲起于会阴穴，一源而三脉，督脉由长强穴贯脊上行，过巅顶，至龈交而止，为阳脉之总督，故曰阳脉之海。任脉上行脐腹，过咽喉，至承浆而止，为阴脉之承任，故曰阴脉之海。阳维起于诸阳之会，由外踝之金门穴，而上行于卫分。阴维起于诸阴之分，由内踝之筑宾穴，而上行于营分。夫人身之经络繁密，二脉能于阴交阳会之间，加一紧缚，举纲齐目，而阴阳斯得维持之力。阳跷之脉，起于足跟，循外踝上行于身之左右。阴跷之脉，起于足跟，循内踝上行于身之左右，所以使机关之跷捷也。冲脉前行于腹，后行于背，上行于头，下行于足，凡筋骨肌肉，无处不到，十二经络上下之冲要，故曰十二经络之海。带脉横围于腰，状如束带，所以总束诸脉。

医家知乎八脉，则十二经、十五络之旨得矣。修炼家知乎八脉，则龙虎升降，元牝幽微之窍妙，于此入其门矣。养生者无事之暇，撮起督脉，循尾闾夹脊双关，上行脑顶，下

通乎任，循环无端，终而复始，久久调息，二脉贯通如一脉矣。

人身元阳之气，自下而生者，亦自下而竭。督任相联，转运不已，有其生之，断难竭之，而寿有不稳固者乎。鹿顾尾闾，能通督脉。龟纳鼻息，能通任脉。二物俱得长寿，有明征矣。提督而上行也，阴阳维跷，随督而升。通任而下行也，阴阳维跷，随任而降。一升一降，阴阳维跷，亦得为之疏畅。由是从会阴穴起，上至天，下至渊，所以运其冲也。从季肋穴起，左转三十六，右迴三十六，所以运其带也。第见营卫和而颜色日以滋润，机关利而手足日以轻捷。三百六十骨节，节节光莹，八万四千毛窍，窍窍亨通。血不蹇涩，气不停滞，六淫不得而干之，七情不得而伤之。去病延年之方，未有过于此者。何必采商山之芝，贮铜盘之露，而后永其寿乎。从知紫府长生诀，尽在奇经八脉中。（《参同契》曰北方河车，即此法也。循而习之，疏经畅脉，可以养生，进而求之，还精摄气，可以延年。神而明之，进火退符，可以夺丹。《仙经》所传，抽铅添汞，降龙伏虎，擒鸟捉兔，霏雪产莲，无不寓于其中。浅者得之为浅，深者得之为深。）

【解】

奇经八脉	{	督脉	任脉
		冲脉	带脉
		阳维	阴维
		阳跷	阴跷

督脉——阳脉之海：起会阴，贯脊，过顶至龈交。

任脉——阴脉之海：起会阴，经脐腹至承浆。

冲脉——十二经络之海：起会阴，经腹背行头足。

带脉——总束诸脉：横行于腰。

阳维——由外踝诸阳之会金门，上行于卫分。

阴维——由内踝诸阴之会筑宾，上行于营分。

阳跷——起足跟，循外踝，上行身之左右。

阴跷——起足跟，循内踝，上行身之左右。

去病延年——升降行运奇经八脉：和营卫，通毛窍，利骨节，行气血，生元阳。

脏 腑 说

人身一太极也。静而生阴，则为五脏。动而生阳，则为五腑。一动一静，互为其根。吸门内气管所系，手太阴肺、手少阴心，居于膈上。足太阴脾、足厥阴肝、足少阴肾，居于腹下。脏数五，其形象地，静而得方。食管所系，足阳明胃、手太阳小肠、手阳明大肠，一路贯通。足太阳膀胱（有下口而无上口）、足少阳胆（有上口而无下口），两腑对照。腑数五，其气象天，动而行健。手少阳三焦、手厥阴心包络，有经无形。

以五脏位置言：离为心火，居南、坎为肾水，居北。坤为脾土，居中。肝不全居左，而震为肝木，居左，气自行于左。肺本不居右，而兑为肺金，居右，气自行于右。

以五腑位置言：初以胃，统纳水谷，次以小肠，分清水谷，于是大肠消其谷，膀胱渗其水，胆则司其事。

以阴阳匹配言：心与小肠合，丁丙共宗。肺与大肠合，辛庚一本。脾与胃合，己戊伴居。肝与胆合，乙甲同体。肾与膀胱合，癸壬并源。包络与三焦合，营卫相亲。

以阴阳交媾言：三阴从天降，手太阴肺，手少阴心，手厥阴心包络，列之于上。三阳从地升，手阳明大肠，手太阳小肠，手少阳三焦，列之于下。其中脾阴胃阳，肝阴胆阳，肾阴膀胱阳，更迭相济。

以脏腑经络言：手之三阴，从胸走手（手太阴肺，从中府而走手大指之少商。手少阴心，从极泉而走小指之少冲。手厥阴心包络，从天泉而走中指之中冲）。手之三阳，从手走头（手阳明大肠，从手大指商阳，而走头之迎香。手太阳小肠，从手小指而走头之听宫。手少阳三焦，从手四指关冲，而走头之丝竹空）。所以肺、心、包络、大小肠、三焦，皆称之曰手。足之三阳，从头走足（足太阳膀胱，从头睛明，而走足小趾之至阴。足阳明胃，从头头维而走足次趾之厉兑。足少阳胆，从头童子髁而走足四趾之窍阴）。足之三阴从足走腹（足太阴脾，从足大趾隐白，而走腹之大包。足少阴肾，从足心涌泉，而走腹之俞府。足厥阴肝，从足大趾大敦，而走腹之期门）。所以膀胱、胃、胆、脾、肾、肝，皆称之曰足。

以阴阳多少言：太阴、太阳为正。少阴、少阳次之，厥阴（阴尽也）、阳明（并左右之阳，两阳合明也）又次之（本王启元《内经注》）。肺、脾得正阴之气，以太阴称。心、肾属少阴。包络与肝，则厥阴矣。受阴气，以是为痿。膀胱、小肠，得正阳之气，以太阳称。三焦与胆，属少阳，胃与大肠，则阳明矣。受阳气，以是为痿。

以脏腑功用言：主宰一身者心，而小肠为受盛之官。宣布万事者肺，而大肠为传导之官。谋胜千里者肝，而胆为决断之官。颐养四体者脾，而胃为仓廩之官。精贯百骸者肾，

而膀胱为津液之官。三焦为气之父，包络为血之母。

夫一脏一腑，五脏而称六腑者，以三焦属腑，故言六腑。然三焦属腑，而称六腑，包络属脏，宜亦可称六脏。由斯而论，言六腑，必言六脏。言五脏，只可言五腑，以合天地之数。何必参差其说，而言五脏六腑哉。缕陈脏腑，灿然可考，而有不离乎脏腑，亦不杂乎脏腑，非形象之可绘，言事之可传者，妙在元关一窍。

命门提要（详后论中）

人身以命门为本，而论命门者，不一其处。为此坎为水，一言尽之。盖坎阴包乎阳，一言水而火在其中，如必象坎之形，两边一画为阴，中间一画为阳，则拘矣。独不闻画前原有易乎。

三焦辨

《难经》注三焦，一则曰：有名无形，与手厥阴相表里。再则曰：有名无形，其经属手少阳。词旨极为明白。叔和定《脉经》，因之以立论，可谓善于祖述矣。辨《脉诀》者，不求甚解，以为明有其经，又曰无其形，自相矛盾，为此不经之谈。而有为之原者，《脉诀》出于六朝高阳生假名伪撰，叔和《脉经》中决不为此语。不知叔和实根于《难经》，《脉诀》亦未背乎叔和，辨之者愤愤，而辨原之者亦冥冥。而原读《难经》者，将三焦对诸脏腑读之，涣然冰释矣。肾之形如豇豆，而三焦之形何似？脾之形如马蹄，而三焦之形何

类？心之形如莲苞，而三焦之形何若？肺六叶而形如华盖，肝七叶而形如甲拆、三焦亦有叶可数，形可拟乎？五脏无不皆然。经则起于关冲，终于丝竹，凡二十三穴，左右四十六穴，岂不有名无形，而行经于上中下乎？究其源，滥觞于宋儒，将高阳生一辟，庞安常倡其端而指其瑕，戴同父和其说而辨其谬。

厥后一派名流，俱以耳读书而不以心读书，凡《脉诀》之本于《灵》、《素》、《难经》，微词奥旨，有难晓者，概归于高阳生之僭拟，高阳生阳受其贬，阴实受其褒，夫高阳生立七表、八里、九道之目，而遗数脉，其罪实无可逃。其余不过文不雅训，荐绅先生难言之，而乃于词之晓畅者，亦谓高阳生杜撰，高阳生不应受如是之诬。学未深造而轻议古人，多见其不自量也。

考三焦之功用，乃人身最关要之腑，如天地之三元，总领五脏六腑，营卫经络之气，而为诸气之宗。以其资生于肾，与肾合气，肾为元气之正，三焦为元气之别，并命门而居，候脉者，亦候之右尺，可谓深知经脉者。余谓不然，上焦主内而不出，其治为膻中。中焦主腐熟水谷，其治在脐旁。下焦主出而不内，其治在脐下一寸。既平列上中下三焦，候脉自宜候寸关尺三部。

【解】

三焦：

三焦——有名无形，手少阳经与手厥阴经相表里。

功用——总领五脏六腑，营卫经络之气：为诸气之宗。

资生于肾——与肾合气：肾为元气之正，三焦为元气之别，并居命门。

上焦——内而不出，治在膻中。
中焦——腐熟水谷，治在脐旁。
下焦——出而不内，治在脐下一寸。
三焦脉——候寸关尺三部。

心包络辨

《灵兰秘典》称心为君主。《二十五难》称包络为心主。盖心主有形之君，包络是无形之主。

柱下史云：“常有欲以观其微，常无欲以观其妙”（微，如游微之微，中边洞彻，无所不周，惟朕兆甫萌，端倪乍露，乃能灼见其真，故必于常有时观之。妙，如元妙之妙，宇宙洪荒，无所不包，惟机关未启，意念未兴，始可洞彻其质，故必于常无时观之。亦仿佛无名天下之始，有名万物之母之言。后世梁王份对高祖曰：“陛下应万物为有体，至理为无”，盖暗合此意耳）是也。

宋元《脉诀》，不知仿自何人，因包络动则喜笑不止，与十二官内膻中喜乐出焉相吻合，遂以包络即膻中。亦思膻中为臣使之官，君臣大义，名分森然，何以只知读下一句而不知读上一句乎？且将包络绘其图于简编，独不闻心主与三焦相表里，俱有名无形，何以能知著《脉诀》，而不知读《难经》乎？包络之经，虽起膻中，以无职统众职，尊卑原是攸分。心有形，心主无形，天下惟无形者，其用最神，所以君主无为，心主用事，空空洞洞之中（天至地，八万四千里，空空洞洞。人心至肾，八寸四分，空空洞洞），总视心主何如耳。

心主泰然，志气日以清明，义理日以昭著。仰无所踞于天之高，俯无所踏于地之厚，率性而行，梦寐亦形其畅适于以想见。簞瓢陋巷之回，春风沂水之点焉。

心主愤然，物欲莫辞其憧扰，精神莫定其从违。未尝临深，而若临渊将陨。未尝登高，而若登山将崩。任情而动，宴安亦露其张皇于以想见。因石据藜之象，噍杀啾缓之音焉。

余用是而知天地之道，其犹橐籥乎，无底曰橐，有窍曰籥，中间一窍，无人摸着，指心包络也。解悟此窍璇玑，立跻天仙地位。

其候脉也，菩提本无树，明镜亦非台（《传灯录》：五祖宏忍大师欲求法嗣，令寺僧各述一偈，时有上座神秀者，众所宗仰，于壁上书曰“身是菩提树，心如明镜台。时时勤拂拭，莫使惹尘埃”。六祖慧能，时为行者，闻之则曰：“美则美矣，了则未了”，至夜潜书一偈于秀偈旁曰：“菩提本无树，明镜亦非台，本来无一物，何处惹尘埃”，五祖见之嗣遂定）。

有非《灵》、《素》、《难经》之所及者，请读无字之经（《梵典》南土遣使诣西竺取经，国王将经秘函给使者，还至中途，开视书中，并无一字，因复至西竺，国王笑曰：“吾念南土至诚，不惮跋涉，故将上乘无字经给发，岂知只知读有字之经，不知读无字之经。”故南土所传，皆有字下乘经）。

【解】

心——君主，有形之君。

心包络——心主，无形之主，无形用其神。

心主泰然——志气清明。

心主愤然——神志不定。

心包络脉——无形，如“无字经”。

反关脉解

寸口为脉之大会，诊家于此候吉凶死生。间有脉不行于寸口，由肺列缺穴斜刺臂侧，入大肠阳溪穴而上食指者，名曰“反关”，非绝无仅有之脉也。人，一小天地也，盍观于天乎？

日至为天之大经，七政为纬（七政，日月五星也。二十八宿，左转为经，七政右旋而行，为纬），周行于天而迟留伏逆，凌犯交食（五星与日三合会则迟，与日对冲或与日隔宫遇则留，与日同度是伏，逆亦在对冲隔宫。凡星不循常度，乱入次舍为凌犯，交食即日月蚀也）。

甘石氏（古之掌天文之官，如周礼冯，相保章之类）可得而推之。

若夫数应谪见，偏无侵蚀之愆（《礼记》：“阳教不修，谪见于天，日为之食。阴教不修，谪见于天，月为之食”，食即相侵相蚀也。数应，然而竟不然者，或有他善之举，以宥其小愆，或有悔祸之机，以俟其速改，抑势之巧中其偶耳）。

官设眡侵，果验宿离之忒（《周礼》眡侵掌十辉之法，以观妖祥，辨吉凶。若阴阳变为侵，赤乌成象，镌而横刺，监而抱珥，蔽而昼闇，蒙而光瞽，白虹弥贯，云气叙列，朝隤日上，推气可想。《月令》宿离不贷，宿星躔次，离星过舍，贷与忒同，设官如是，而天象如是者，抑势之会逢其适

耳)。

与夫景客孛彗(景星，德星也。太平之世，则景星见。又《天官书》：天晴则景星见，客星无常次。《汉书》：子陵与光武共卧，以足加帝腹。次日，太史奏客星犯御座。孛彗，妖星也。《春秋》：昭十七年冬，有孛星入于大辰。注：孛，孛星也。《尔雅》：彗星为撻抢，注亦谓之孛。又《汉书》文颖注：“孛星光芒短，其光四出，蓬蓬孛孛也。彗星光芒长，参参如扫彗也。”二星似少异。)

征休征咎，应时而见，则势之适然者。甘石氏虽然洞悉其微，而究莫能弥缝其阙。又不观于地乎，东向为水之大会，决汝汉而排淮泗，顺其性而导之，因其壅而疏之，禹之行其所无事也。至若弱水入于流沙，反为导水之始。黑水入于南海，实据东流之先，虽禹亦不得强使之东。但得安澜有庆，亦不必定归之于东矣。

人得天地之气以生，脉会于寸口者，得天地之正者也。脉反其关者，得天地之偏也。然偏也，非病也，均之得气以生也。其三部定位，于寸口无异。

七表八里九道三余脉辨

浮沉迟数，脉之纲领，《素问》、《脉经》皆为正脉。《脉诀》立七表、八里、九道之目，而遗数脉，不辨而知其不可宗。然体裁既变乎古而明其谬，意义自当分析于今而折其衷。

天地未辟，老阴、老阳用事。天地既辟，少阴、少阳用事。少阳之数七，七主天，天有七政，居地之表。少阴之数

八，八主地，地有八极（《淮南子》：“九州之外，乃有八寅。八寅之外，乃有八纮。八纮之外，乃有八极”），居天之中。

阳常有余，阴常不足（天包乎地，男强于女，牡健于牝，雄矫于雌）。《经》曰：能知七损八益则足以治病者，此也。

天地之数，始于一而终于九，故天有九天，九星，九道之名（九星即贪狼、巨门、禄存、文曲、廉贞、武曲、破军、左辅、右弼。九道：青道二、白道二、赤道二、黑道二、合黄道而为九也。九天，《周子》一为宗动天，二为恒星天，以下七政各一重天。又《太元经》：一中天、二羡天、三从天、四更天、五粹天、六廓天、七减天、八沈天、九成天）。地则有九州、九野、九河之号。黄帝因天之象以画地之形，广轮错综，无少畸零。《易》曰：“地道无成而代有终”，其是之谓乎？期三百有六，旬有六日，合气盈朔虚以置闰，而后岁功成焉。

人一小天地也，七表以法天，八里以法地，九道以法天地之九数，补三脉以象归奇之闰。

《脉诀》分类之义，想当然耳。今举为对待，配以阴阳，一物不离乎阴阳，以阴阳该之，而七表、八里、九道、余三，无不寓于其中，以俟千秋百岁，自有论定之者。

七 诊 辨

《脉经》曰：七诊者，一静其心，存其神也。二忘外意，无思虑也。三均呼吸，定其气也。四轻指于皮肤之间，探其腑脉也。五稍重指于肌肉之际，取其胃气也。六再重指于骨

上，取其脏脉也。七详察脉之往来也。

据《脉经》所说，指临时言。以余诀之，用功不在临时，而在平时。平居一室之中，内以养己，恬静虚无，一存其神，二忘其虑，三均其呼吸。沉潜于脉理之场，从容于脉理之圃，将心所存之神，意所忘之虑，鼻所出人之呼吸，尽附指头。不以心所存之神为存。不以鼻所出人之呼吸为呼吸，而以指所出人之呼吸为呼吸。以之探脏腑，取胃气，察脉之往来，无论燕居间暇，即造次之时，颠沛之际，得之于手，应之于心矣。


盖手中有脉，而后可以诊他人之脉。若平时未及揣摩，徒事口耳之学，临时从七诊分晰，心中了了，指下难明。况医常仓卒，病值危急，又何以尽七诊之法，而一无遗漏也乎。

【解】

- 七诊 —
- 一、静心——存神
 - 二、忘外意——无思虑
 - 三、均呼吸——定气
 - 四、轻取皮肤间——探腑脉
 - 五、稍重取肌肉间——取胃气
 - 六、重指骨上——取脏脉
 - 七、察脉往来

- 平时脉动 —
- 一、存神
 - 二、忘虑
 - 三、均呼吸
- 沉潜于脉理

- 手中有脉 —
- 不以心所存之神为存——神在指上
 - 不以意忘之虑为忘——意在指上
 - 不以鼻出入呼吸为呼吸——呼吸于指上




九 候 解

寸关尺为三部，一部各有浮中沉三候。轻手得之曰举，候浮脉也。重手取之曰按，候沉脉也。不轻不重，委屈求之曰寻，候中脉也。三而三之为九。

浮以候表，头面皮毛外感之病也。沉以候里，脏腑骨髓内伤之病也。中以候中，中者，无过不及，非表非里，至数从容，无病可议。

古帝王传心之要，所为以一中括天地之道而立斯人身心性之宗者，此也。古人以之为心传，吾人亦以之征心得，盖中与和通，谓其和缓而不邻于躁也。中与庸近，谓其平庸而不涉于偏也。其见诸脉，胃气居中，则生机之应也。定之以中，而浮沉朗若观火，三部九候无不了然。

【解】



中医脉法解

浮——举，轻手：表，头面皮毛外感

中——寻，不轻不重：非表非里，无过不及，无病议

沉——按，重手：里，脏腑骨髓内伤

中——
 中——括天地之道，主人身性命之宗，为心传
 中——与和通：和缓不躁
 中——与庸近：平庸不偏
 中——胃气居中：生机之应
 中——定以中：三部九候了然

膻中解

两乳中间，气聚之海，名曰膻中，无经络而有其官。《经》曰：“膻中者，臣使之官，喜乐出焉”。余读《经》文而穆然思，恍然悟，人自坠地以来，未逢笑口，先试啼声。知识甫开，端倪迸露，渐渐客气侵淫，本来流动充满之气，无复中存。

百岁光阴，总是牵愁之岁月。半生阅历，哪寻极乐之寰区。所以生、病、老、死、苦，不能脱其轮回矣。如是，我闻观自在菩萨，心平气和，理直气壮。

慈灯普照（王勃《普悲寺碑》：“宣佛镜于无方，演慈灯于已绝”）。

统五蕴以俱空（《涅槃经》：“五蕴皆空”，即六入之类）。

智炬长明（梁简文帝《菩提树颂序》：“智灯智炬之光，照虚空于莫限”）。

取十方而胥净（唐太宗《圣教序》：“宏济万品，典御十方”）。

破烦恼网以慧剑（《维摩经》：“以智慧剑，破烦恼网”）。

生安稳想于化城（《法华经》：“法华道师于险道中化作一城，疲极之众，生安稳想”）。

广大乾坤，逍遥世界，舒长日月，容纳须弥（《维摩诘经》：“以须弥之高广，纳芥子中而不迫窄”。昆仑山西方曰须弥山）。

若夫情根不断，憾种难翻，荆棘丛中，无非苦戚。葛藟藤里，绝少安闲。鼻观壅木樨之香（《罗湖野录》：“黄鲁直从晦堂和尚游，时暑退凉生，秋香满院。晦堂曰：‘闻木樨香乎？’公曰：‘闻’。晦堂曰：‘吾无隐乎尔’。公欣然领解”）。

心期迷梅子之熟（《传灯录》：大梅和尚曰：“任汝非心非佛，我只管即心即佛”。马祖曰：“梅子熟也”）。

查无妙叶（梁简文帝《元圃讲颂》“树葳蕤于妙叶”）。

哪发空花（梁昭明太子诗：“意树发空花”）。

然则涤偏气于往来，高悬明镜，涵元气于夙夜，永保灵犀（义山诗：“心有灵犀一点通”）。

云蕊函开，便为清福之地。月苗杯举，别有浩洞之天（陆龟蒙《道室诗》：“月苗杯举有三洞，云蕊国开叩九章”）。克效臣使之司，允称喜乐之国。

【解】

膻中——气聚之海，无经络，贮神涵灵，以意行之。

丹 田 解

脐下有丹田，有活见之处，而不可以分寸计。人之动气，根于两肾，生于丹田。气足内藏，鼻息微细。气虚上

奔，鼻息喘促。无气有气，有气无气，以此为辨。而名为丹田者，则非医家所能通晓。

余与梯云道人（姓谢，字际洛，新化人，甫八岁，病狂，所言皆蓬莱海岛之事，十四岁方瘳，十五岁发蒙，越明年，游泮。一动一静，无不以圣贤自规）。了悟山人（姓刘，讳宗因，字群占，号济南，邵阳人。天生一种慈祥恺惻之性，日以普渡众生为念。鬓发雪白，满面红光，梦觉道人游湘，寄书未至，预对家人曰之，有“可知息息相通处，未见瑶函先见形”之句），同考道于梅城雷公洞（在城南九十里，洞窈而深，巨石一水冲破。梦觉道人循口壁凿开，为新邵通衢，约一里许。正居洞中间，傍溪献一大岩，生成考道之所。基砥而垠爽，顶锅而风藏。门面奇花异草，四时郁馥。壁脚方床圆几，百窍玲珑。不寒不暑，常在二八月天气。有炉有灶，包含亿万劫金光）。

忽一朝，谢子微笑曰：“吾今知脐下为丹田，乃藏丹之所也。昨宵漏永，宝鼎浓浓，光透帘帟，夺得金精一点。恍兮惚兮，活见于脐下矣。”

余曰：“水中之铅，经火一炼，化而为丹。些子机关，只可自知，余亦将有得，不堪持赠君尔。”时刘子犹未悟也。谢子灵根夙植，仙骨珊珊，雅有逸鹤闲鸥之致，闻道独早。三人参究原理，得益于谢者居多。厥后刘亦勇于上进。

一痕晓月东方露（坎戊，月精，晓月露者，药苗生也）。

穷取生身未有时（天地未有时，先有贞元会合之真气，而后有天地。生身未有时，先有贞元会合之真气，而后有生身。晓月露，追取行有之真气，归于生身）。其所得更有过于余与谢者。

桃花夙有约，同泛武陵槎（陶渊明《桃花源记》：武陵人，捕鱼为业。缘溪而行，忘路之远近，忽逢桃花夹岸，数百步中无杂树，行到源头，山有小口，仿佛若有光。舍船从口入，其中往来种作，男女衣裳，悉如外人，黄发垂髫，怡然自乐。自云先世避秦人乱，来此绝境，不复出焉，遂与外人间隔）。

【解】

丹田——脐下，不以分寸计。人之动气根于肾，生于丹田。丹田乃人身水火凝炼处。

人迎气口解

左手关前一分为人迎，右手关前一分为气口。《脉经》曰：“人迎紧盛伤于风寒，气口紧盛伤于饮食”。夫前一分，即左右寸也。

左寸本以候心，心非受风寒之所，而以为紧盛伤于风寒。右寸本以候肺，肺非积饮食之区，而以为紧盛伤于饮食。辗转思维，不得其解。乃今于天地运行而知矣。

天左旋，风寒为天邪，人迎之而病，邪氛胁逼，畏风恶寒，亦见于左之上部。地无旋，地之气右旋，人身之气亦从右始，是以右之上部不名寸口而名气口。

一部各分天地人三候，上部之地属阳明胃经，主消纳五谷，内伤饮食亦先见于右之上部。以其本位而言，则曰心与肺。以其受邪而言，则曰人迎气口。

【解】

人迎——左寸：本位为心，受邪为人迎。天左旋，风寒为天

之邪。

气口——右寸：本位为肺，内伤饮食见于气口。地气右旋，上部地阳明胃经。

冲阳太冲太溪解

人之两手为见脉之所，而不知两足尤为树脉之根。冲阳动脉在足跗上五寸陷中，属阳明胃经。太冲动脉在足大趾本节后三寸陷中，属厥阴肝经。太溪动脉在足踝后跟骨间，属少阴肾经。

病当危殆，寸关尺三部俱无，须向三脉诊之，如往来息均，尚有可生之路。

试观小儿二三岁时，好赤足，八岁好趋，十岁好走，阳气从下而生也。五十足渐畏冷，六十步履维艰，阳气从下而耗也。两足无脉，纵两手无恙，其命不能久留。两手无脉，而两足有脉，调治得宜，亦可挽转生机。一心应变，宏敷济众之仁。万象回春，允副好生之德。

【解】

脉之根——
—冲阳脉——足跗上五寸：阳明胃经
—太冲脉——足大趾本节后三寸：厥阴肝经
—太溪脉——足踝后跟骨间：少阴肾经

两足无脉，两手脉无恙——命不久。

两足有脉，两手无脉——可治。

男女尺脉异论

男女异质，尺脉攸分，卜寿夭于目前，温犀易辨（《晋

书》：温峤过牛渚矶，深不可测，遂燃犀角照之。须臾见水族，奇形异状，或乘车马着赤衣者，峤至夜梦人谓：“日与君幽明相隔，何若乃尔”）。

定荣枯于指下，秦镜难逃（《西京杂记》：秦始皇有方镜，照见心胆）。

男脉尺藏，抱朴守真，德寿之考。归神敛气，福禄之翁。

若浮洪而短，其祸有不可胜言者。碌碌蓬庐，终日待株林之兔（《列子》：野人有遇一兔走触株林而死，辄拾以归，其后守株以待兔）。

悠悠岁月，无路看长安之花（孟效诗：“春风得意马蹄疾，一日看尽长安花”）。

而且每多斯疾之呼，膏肓莫治，定有夫人之恸，命数难延。

女脉尺盛，雅秀彬彬，芝香玉砌，精光炯炯，桃熟瑶池。

若隐伏而微，其祸又不可胜言者。

郊谋无灵，空履大人之迹。螟蛉有子，徒闻象我之声。而且狮子吼于河东，乞怜处士（《东坡集》：“陈季常佞佛，妻柳氏性悍，客至常闻垢声。东坡戏之曰：龙邱居士亦可怜，谈空说法夜不眠，忽闻河东狮子吼，拄杖落手心茫然”。按：狮子吼，梵书名佛声震，小说自息，犹狮子吼，群兽皆藏）。犍车乘于洛邑，见戏相臣（《妬记》：洛中王导，妻曹夫人性妬，导惮之，乃别营馆居妾，夫人知之，率婢持刀寻讨，导恐，飞辔出门，左手攀车栏，右手提尘尾，以柄打牛，司徒蔡谟戏曰：“朝廷欲加公九锡”，导弗之觉，但谦退

而已。谟曰：“不闻余物，惟有短辕、犊车、长柄尘尾”，导大怒）。

【解】

男脉尺藏——福祿。

浮洪短——祸。

女脉尺盛——雅寿。

隐伏而微——祸。

癆症脉数论

病症最苦者莫如癆。《脉经》注：“脉数不治”。而未注明所以脉数所以不可治之故。

天一生水，天一，奇数阳也，而生水则为阴矣。阴阳同宫，是一是二，解人当自分明。《难经》注“左肾以藏水，右肾以藏命门”，固为传写之讹。即方书谓“两肾一般无二样，中间一点是元阳”，亦是隔膜之谈。盖阴生于阳，阳藏于阴，诚有分之而无可分者。人自因地一声以来，有些水即隐此火，而穷通寿夭，皆决之于此。

《入药镜》（崔公希范著）云：“惟有水乡一味铅是也（乾坤交媾罢，破乾为离，破坤为坎，铅为金丹之母，八石之祖，先天一点乾金，走入坎水中，化而为铅。由乾阳来，是为真火）”。水足而火之藏于水中者，韬光匿采，而六脉得以平和。水虚而火之见于水中者，焕彩闪光，而六脉何能安静。水之包涵乎火，夫固有一滴之不可亏者。

病而名癆，癆者，牢也，牢固难解之辞也。或曰取其劳

苦、劳役、劳顿之义。吾则曰：劳字从火，相火一煽，君火随之而炽，二火争焰而癆焉。盖一勺之水，煎熬殆尽，火无所附丽，飞越于上。犯营则逼血妄行，克金则咳嗽不已，灼津液则饮食变为痰涎，蚀肌肉则形骸为之骨立。一身之内，纯是火为之猖獗，脉之所以数也。精竭神枯，脉之所以细而数也。


夫性命之理，至为微妙。性藏于心，命藏于肾。命即指此火也。有水，火可以引之归元。无水，火亦无所归宿（龙雷之火潜于水中，得温暖则藏）。水冷则火升，咽痛，唇裂，口渴，面赤，投以桂附，温基窟宅而招之，火自归乎原位。《本草》所以有以此引火归原之语，世医不察，概施之无水并邪火之症。人之死于非命者，无冤可诉。

揆厥由来，祸肇于景岳，《医贯》、《薛氏医案》诸书，流毒二百余年。天心仁爱斯民，亦有悔祸之机，自《慎疾刍言》、《医学汇参》书出，而吴越之风息。自如是，我闻唤醒世人书出，而燕赵之风息，惟荆楚何辜，此风犹自盛行，直至焰消灰尽，命亦于此尽失。其可治乎？其不可治乎？惟愿同学君子，遇症之自内出者，稍见脉过其止，即以醇静甘寒之品养之（百合、熟地、枇杷叶、梨汁、童便、麦冬、桑皮、地骨皮之类。经验加味地黄汤：熟地黄、淮山药、枣皮、泽泻、云苓、生地黄、麦冬、丹皮。百合固金汤：生地、熟地、百合、麦冬、芍药、当归、贝母、元参、桔梗、甘草），无使至于数也，诚济世之慈航也。然则问：此火离乎本位，出没无端，隐显莫测，可确指其侨寓何处乎？余应之曰：分明香在梅花上，寻到梅花香又无（拈花示众）。

（余著是稿，殊触当日隐憾也。年十三应童子试，见赏

宗工，曾拔前茅。旅馆风霜，归患水肿，误服桂附，几濒于危，忽江西来一老医，姓聂，名广达，以乳蒸黄连服之而愈，究中桂附伤，随即吐血、咳嗽、潮热等症作矣。一室之中，调养五载，博采医书，折衷一是，惟日服甘寒之品，身体渐次复原，医亦稍得门径。本欲理吾旧业，以绍箕裘，而日夜求治者，接踵搅心，因将手泽度之高阁。迨寻五十年前梦，云散天空一道人。）

【解】



噎膈反胃脉缓论

余得一缓字诀，以决病之死生吉凶。凡遇噎膈反胃，脉未有不缓者，其将何以决之？余用是三思焉。

因其脉之缓，而知其脾无恙焉。肾无恙焉，心肝肺无恙焉，惟是一胃之累，居于要地，遂积成莫疗之病，即其脉以

思其症，绳以理而溯其源。

《经》曰：金木者，生成之终始（《河图》：天一生水，地二生火，即乾元大生，坤元广生之纲领，故水火之功用，亦足以维系乎天象地舆。至土以五十居中，寄旺于四时。尤其彰明较著者，惟天三生甲木，地八乙成之，乃滋生之始事。所谓一生二，二生三，三生万物者，此也。地四生辛金，天九庚成之，乃集成之终事，所谓战乎乾，劳乎坎，成言乎艮者，此也。故木气司权，丰草绿缛而争茂，佳木葱茏而可悦。金气司权，草拂之而色变，木遭之而叶脱）。

物之化，从乎生，物之成，从乎杀。生杀之机犹权衡之不可轻重也。人生百年，一大春秋耳。年当杖乡杖国，正值秋月之天，由是阳明之庚金，其气化为燥，由下冲上，冲于阑门、幽门，谓之反胃，朝食暮吐或隔宿方吐。冲于贲门谓之膈，即食即吐，冲于吸门谓之噎，食难下咽。燥之所冲，门遂为之枯槁。叶黄禾熟之候，纵日暄风动，露滋雨润，而欲转其青焉，抑已难矣。

《经》曰：“三阳结（手阳明大肠、足太阳膀胱、手太阳小肠），谓之膈”，不独指阳明经。亦思三阳同居下位，岂有一阳结（阳明金燥），而二阳不随之而结者乎（膀胱与小肠津液，随之而枯）？所以吐沫，刺痛，羊粪，总由于燥结然耳。

东垣通幽汤（当归身、升麻、桃仁、红花、炙草各一钱，生地、熟地各五分），其理最为深邃，存其方可矣。

丹溪禁辛燥（丁香、白蔻、砂仁、半夏、陈皮之类），虽其义极为晓畅，存其语可矣。

若喻嘉言、李士材于是症，一则商其补脾补肾，未悟其脉，一则酌其下气坠痰，未达其症。

然则，此症无可治乎？曰：非也。年未登五十，燥非其时，或为醇酒所伤，或为煎熬所中，以润燥为主（牛羊乳、童便、芦根、韭菜汁、陈酒、茅根之类。经验方：酒大黄、桃仁、归尾、炼蜜为丸，茅根汁汤送下）兼用四子之书，多有得愈者。

悟利秋来金恋木，翻然方见艳阳天（后天坎离用事，升居乾坤之位，于是八卦各易其位。震木居离火之位，震为苍龙，龙从火里出。兑金居坎水之位，兑为白虎，虎向水中生。龙跃虎腾，金木交并，木之欣欣向荣者，不畏金而反爱金，虽历夏而秋，常在春三二月之天）。

（司马石渭中，端方正直，同硯两载，来往数十年如一日也。年近五旬，酷嗜浓味鱼腥，胸间隐隐作痛，食入即吐，人到知心，刻期取效。心转疑惑，觉古所传之方，一无可用，乃会丹溪之意，日服芦根汤而愈，游湘未悟，于今三年，是夜援笔成论，顿兴我以暮云春树之感）。

【解】

人生秋岁，阳明庚金，气化为燥，由下冲上，食门枯槁，治在润燥。

冲于阑门、幽门——反胃：朝食暮吐。

冲于贲门——膈：食入即吐。

冲于吸门——噎：食难下咽。

体肥脉虚中症论

气为阳，血为阴，阴阳配偶不参差，五脏调和脉斯正，

惟是体格丰隆，一线之微阳，不足以敌硕肤之阴躯。居恒服温补性味，殊觉相宜。寒凉性味，一滴逆口，由是气虚，是以脉虚耳。

盖尝论之，气，无形者也。血，有形者也。有形者，全赖无形者为之运用，而后足得以行，手得以握，耳得以聪，目得以明，鼻得以闻其香臭，口得以知其五味。虽然尤有进，无形者能运有形，而不知更有无形者，为之主宰，无形者方得宣布于四肢，充塞于五脏六腑。

无形者何？真气是也（以其所运而言，曰真气，以其所居而言，曰谷神。《道德经》：“谷神不死，是谓元牝。元牝之门，是为天地之根”。手足耳目口鼻，皆根窍于元牝。元窍一闭，耳非不孔窍玲珑，而不能听。目非不黑白分明，而不能视。鼻非不呼吸出入，而不闻香臭。口非不咀嚼珍蔬，而不知五味。手足非不血光红润，而不握不行）。今为阴血所压，无形者馁矣。无形者馁，则有形者亦馁矣。

古今卒中之症，大半患于体肥之人，职是故耳。方书所载中症许多言说，徒事喧哗。一言以蔽之曰：“气脱”。其卒然而毙者，真气脱也。其毙复苏者，真气犹存。凡气一时不足以胜形体之任，其手足不用不仁者，元窍闭也。

元窍闭，调治得宜（脉虚、脉芤、脉迟经验方：黄芪、人参、焦术、附片、当归、川芎、苡米、姜枣引。脉洪、脉数、脉细经验方：熟地、人参、枸杞、当归、苡米、丹皮、麦冬、五味。如初中半身不遂，不省人事，筋急拘挛，口角喎斜，语言謇涩，脉弦而数，则以风论，小续命汤：防风一钱二分，桂枝、麻黄、杏仁、川芎、白芍、人参、甘草、黄芩、防己八分，附片），轻者亦有痊愈，重者或苟延岁月。

调治失宜，真气亦不能久留，知几之士，见其体肥脉虚，时常培养元阳（经验方：附片、干姜、人参、黄芪、焦术、肉桂、当归、炙草、姜枣引。鹿茸桂附丸：附片、肉桂、鹿茸、熟地、淮山药、丹皮、枣皮、泽泻、茯苓），庶有裨焉。

有形四大皆假合（潜确《内书》四大：地水火风也。地无坚性，水性不住，风性无碍，火假缘生。《释典》：骨肉为地，涕唾津液为水，暖气为火，骨节转运为风。达者谓之幻身，古佛偈假借四大以为身），无形中有主人翁（《性命圭旨》：主人翁，姓金，号元晶，自虚无中来，居杳冥之乡）。

岐伯曰：“中风大法有四：一曰偏枯，半身不遂也。二曰风痲，身无疼痛，四肢不收。三曰风瘖，奄忽不知人。四曰风痹，诸痹类风状也。”

夫曰风痹，真风也。所谓偏枯、风痲、风瘖者，以其舌强口瘡，卒倒无知，形似乎风，因以风名。详究其义，实与风毫不相涉。就其症而言之，手撒，脾气绝矣。口开，心气绝矣。鼻鼾，肺气绝矣。目闭，肝气绝矣。遗尿，肾气绝矣。汗出如珠，发直如麻，面赤如妆，真阳鼓散于外矣。扶其精而穷其奥，总归宿于肾元。盖肾为性命之根，如止见一二经，尚未伤及于肾，急相其肾之水亏、火亏，培之补之，而受伤之脏，自复其初。

朱丹溪以为痰则生火，火则生风，固属捕风捉影。李东垣以为本气自病，将风字涂抹，其于是症，亦似有得，究未窥其底蕴。河间以为将息失宜，心火暴甚，而著地黄饮子（熟地、枣皮、巴戟、附片、肉桂、苁蓉、茯苓、麦冬、五味、石斛、菖蒲、远志），可谓抉出疾源矣。顾肾水火同宫，

有痰涎上涌，水不足者。有面赤烦渴，火不足者。地黄饮子仅是补其火，赵养葵又补明水不足者，用地黄汤滋其水。庶岐伯不言之蕴，得以阐明于世。治是症者，慎勿存一风字于胸中，斯得之矣。

【解】

中症——气虚、脉虚、体肥者微阳不敌硕体阴躯
 元窍闭——脉虚、脉芤、脉迟
 脉弦数
 体虚脉数——宜常培元阳
 慎勿以风论

喘急脉论

《脉经》曰“上气喘急候何经，手足温暖脉滑生，若得沉涩肢逆冷，必然归死命须倾”。试申论之，人之所赖以生者，元气、宗气，而其所以生者，则真气也。统一身而言，则为元气，元气充足，呼吸自循常度，如涉虚怯，阴阳之气乱矣。

《经》曰：“阴争于内，阳扰于外，魄汗未藏，四逆而起，越则熏肺，使人喘息”。体犹温暖，脉多虚滑，人参能回元气于无何有之乡（独参汤。经验方：黄芪一两，当归三钱，姜枣引），喘息自止。

据中焦而言，则为宗气，宗气转运升降，自无窒碍，如沾痰滞，阳明之气郁矣。

《经》曰：“邪客于阳明之络，令人气满，胸中喘息”。体虽温暖，脉则弦滑，法夏和胃而燥痰（四七汤：人参、肉

桂、法夏、炙草、姜枣引)，喘急随除。至于先天一点真元之气，是为真气，至无而含至有，至虚而统至实。

鼓盪于太虚者，雷也。而其所以默运乎鼓盪者，非雷也，真气也。吹嘘乎万物者，风也。而其所以驱使乎吹嘘者，非风也，真气也。外护于表，内行于里，周流一身者，气也。而所为主宰以周流者，非气也。真气也，释氏调气以悟空，调此气也。老氏炼气以归真，炼此气也。儒者养气以为圣为贤，养此气也。释氏谓之真如（钱起赠怀素诗：“醉里得真如”。刘禹锡诗：“心会真如不读经”）。老氏谓之绵绵（《道德经》：“绵绵若存”）。儒者谓之浩然。其为气也，天地得之，万古不老。生人守之，寿算常存。

人而以酒为浆，以妄为常，醉以入房，真气散矣。真气散，一身之元气、宗气，以致营气、卫气、中气、胃气，一齐奔上，为喘为急，肢之所以逆冷，脉之所以沉涩也，而命有不倾焉者乎？

彼水肿之喘，以水肿论。风寒之喘，以风寒论。哮症之喘，以哮症论。热病之喘，以热病论。《经》中言喘，层见迭出，各有其本，单言喘者，止有数条。撇开各症方言喘，寻到源头始见医。

【解】

喘——喘症——上气喘急，喘为本病
 诸证见喘症——各有本病，喘为标病

喘——脉滑：生——阴争于内，阳扰于外：脉虚滑
 宗气痰滞：脉弦滑
 脉沉涩：死——真气散：元气、宗气、营卫气上奔

气鼓脉弦数论

医学中，刘李朱张而下，瓣香敬祝者，汪子切庵，独于气鼓症，列之湿门中，殊不谓然，究其源，方书俱，不自切庵始。余考其症，是气也，当列于气门，气以类而方明，病虽难而易治。夫气之功用，全赖脾土为之运转（气，分气与炁，土分有无形。脾属土，有形者也，有形之土运气。脾藏意，意亦属土，无形者也，无形之土运炁。有形之土，以药补之。无形之土，以心养之。二者得兼，而土斯健矣）。土旺而气乃周流四体，土衰而气遂停滞中州，贯注躯壳，充盈腠理，郁而为热，气鼓成焉。《经》曰：“诸胀腹大，皆属于热”是也。其为症也，四肢日见瘦羸，肚腹日见胀满，任人揉按，痛痒不关。稍进饿粮，饱闷难受。

脾愈虚，肝益肆其侮。气愈炽，热益张其威。脉之弦且数，其所由来者，有明征矣。

治是症者，当青筋未大见，脐心未大突，缺盆未大满之时，重用黄连，以解其热，清金以制肝盛，培土不受肝邪（经验方：人参、黄连、焦术、麦冬、青皮、肉桂、炙草）。


药固有维持之力，尤宜却咸味，断妄想，存神静虑，以养无形之土，不治气而气自宣通，多有得安者。

其名不一，曰单胀，以其独胀于腹也。曰鼓胀，以其中空无物也。曰蛊胀，若虫食物而中空也。曰热胀，由热而胀也。曰气胀，由气而胀也。统名之曰气鼓也。彼水胀、寒胀，列于湿门，宜也，原与此症毫不相涉。东垣一代伟人，中满分消丸（厚朴一两，枳实、黄连、黄芩、法夏各五钱，

中医脉法解

陈皮、知母、泽泻三钱，茯苓、砂仁、干姜各二钱，人参、白术、甘草、猪苓各一钱，蒸饼为丸），亦尚未晰分也。

【解】



血症有不必诊脉 有必须诊脉论

失血之症有四：从齿失者，曰齿衄。从鼻失者，曰鼻衄。从咽失者，曰呕血。从喉失者，曰咳血、曰咯血、曰吐血、曰唾血。失血则一，而轻重攸分。

最轻者齿衄，足阳明胃脉循鼻入上齿，手阳明脉上颈贯颊入下齿，二经热盛，其循经之血从齿溢出。血路一通，即无热，亦时常而来，于体无伤，不必以药治者也。

稍轻者鼻衄。凡经之上于头者，皆下通于鼻，上阳之脉上抵头角，太阳之脉上额交巅，阳明之脉上至额颅。其血之循于经者，随气周流，走而不守，三经为热所逼，血即从鼻而漏。以童便引热下行，茅根清胃降火，其血立止。

至于漏血过多而无休者，则不责之血热，而责之气虚。

有形之血，一时所不能滋。几希之气，速当挽回，急用参芪补气以督血（经验方：黄芪一两、当归三钱，姜枣引），补气以摄血，补气以生血。虽气息奄奄，亦可回生。

彼伤寒鼻衄，名曰红汗，热随血解，不必止血，亦不必再发汗。瘟疫鼻衄，名曰外溃，毒从血减，不必止血，亦不

必再议下。经络分明，见其症，即可以用其药也。

稍重者呕血，即在胃腑矣。贮积日久，郁而止呕，多则盈盆盈碗，聚则成块成堆。或一月一呕。或间月一呕，或周年一呕，未呕之先，郁闷难安。已呕之后，神清气爽，但得血络通利，有呕至毫盞而无伤者。以恐血阻吸门（急备方：用纸捻刺鼻中，得嚏则通），登时至毙。方书积案，从未有发明其义者。盖胃为五脏六腑之海，血易为之聚。人而饮食煎熬，停留瘀血，结成窠臼，久则相生相养，习以为常，如蚁之有穴，鱼之有渊，生生不已。补之，愈足以滋其党。凉之，徒足以塞其路。辗转图维，惟三七、郁金，以破负固之城。淮膝、大黄，以开下行之路（悬拟方：三七、郁金、牛膝、大黄、归尾、桃仁、枳实。炼蜜为丸），扫除而荡涤之，庶有瘳焉。常见山居之民，采草药以治血，遇是症得愈者居多。草药之性，无非破血之品，有明征矣。

最重者吐血、咳血、咯血、唾血。致病之衅，原不一端，发病之源，总归五脏。脏者，藏也。所以藏其血以养神、养魂、养魄、养意、养精与志也。心不主血，则神为之消散。脾不统血，则意为之惆怅。肝肺不归血，则魂魄为之飘荡。肾不贮血，则精志为之牿亡。

一滴之血，性命随之，全凭脉息以决吉凶。脉而虚弱，火犹未发，归脾汤（人参、白术、茯苓、枣仁、龙眼肉、黄芪、当归、远志、木香、炙草，姜枣引）、养营汤（人参、白术、黄芪、炙草、陈皮、肉桂、当归、熟地、五味、茯苓、远志、酒芍，姜枣引），俱能奏效。

脉而洪数，则内火炽矣，火愈炽而血愈亡，血愈亡而阴愈虚，故曰：阳邪之甚，害必归阴。当此之时，寒凉适足以

伐五脏之生气，温补又足以伤两肾之真阴，惟以寒滋其阴而养其阳（同癆伤论）血或归其位耳。

又有一种，五脏为内寒所侵，血不安位而妄行者，脉虚而迟，非附子、干姜，不足以祛其寒而温其经（经验方：附片、干姜、黄芪、白术、当归、炙草、建元，姜枣引），此百中仅见一二者。

至于外寒犯乎五脏，扰血逆上者，脉浮而紧，惟麻黄人参芍药汤（桂枝五分，麻黄、黄芪、甘草、白芍各一线，人参、麦冬各三钱，五味五粒，当归五分），可以攻其寒而安其血。此亦血症之常事，甚无足怪。所以五脏之血，必诊脉而后能决也。

综而计之，譬之军伍，齿衄、鼻衄，巡哨之士卒也。呕血，护卫之士卒也。咳吐咯唾之血，则守营之士卒也。巡哨之士卒可失，即护卫之士卒可失，而守营之士卒，断不可失者也。经四十载之推求，而血症了解，阅千百人之性命，而血路敢详。

（司马刘芹藻，忽患失血，气喘，脉虚而迟，重用附子、干姜、黄芪，立愈。由是留心医学，讲解《灵》、《素》、《难经》）

【解】

血症因	{	心不主血——神散
		脾不统血——意失
		肝肺不归血——魂魄飘
		肾不贮血——精志亡

失血脉	{	虚弱——火未发：益气血
		洪数——内火炽：滋阴养阳
		虚迟——内寒侵五脏，血不安而妄行：温经祛寒
		浮紧——外寒犯五脏，血上逆：祛寒安血

咳嗽脉论

癆症咳嗽，以癆为本，不在咳嗽论。其余咳嗽，但得病源缕晰，无脉不可以治。欲达病源，先分内外。

外感咳嗽，专责之于肺。风寒之来，先入皮毛，皮毛者，肺之合也。风寒郁于肺则咳嗽，肺窍得通，则咳嗽止焉，故古有外感咳嗽则轻之语。其脉浮而大，散之以葱白，通之以紫苏（参苏饮：人参、紫苏、葛根、前胡、法夏、茯苓、陈皮、甘草、枳壳、桔梗、木香、葱白）。

至于内伤，《经》曰：“五脏皆令人咳，不独肺然也”。而要不离乎肺，其本经咳嗽也。金生在己，形寒金冷，伤其生气，喘息有音，甚则唾血，其脉短而迟，补之以波蔻，温之以砂仁（经验方：人参、焦术、云苓、法夏、陈皮、波蔻、砂仁、炙草、姜枣引）。

其心脏咳嗽也，火甚克金，喉中隐隐如梗状，甚则咽肿喉痹，其脉浮而洪，凉之以黄芩，泻之以山梔（经验方：生地、赤茯苓、山梔、生甘草、黄芩、桔梗、麦冬、灯芯引）。

其脾脏咳嗽也，土不生金，隐隐痛引肩背，甚则不可动，其脉濡而弱，培之以黄芪，操之以白术（经验方：人参、当归、黄芪、焦术、法夏、陈皮、云苓、炙草，姜枣引）。

其肝脏咳嗽也，木燥火发，金被火伤，两胁下痛，甚则不可以转，其脉沉而弦，制之以鳖甲，和之以柴胡（熟地、鳖甲、当归、柴胡、酒芍、炙草）。

其肾脏咳嗽也，火动水亏，金少水涵，腰背相引而痛，甚则咳涎，其脉沉而细，滋之以熟地，坚之以黄柏（知柏地黄汤：熟地、淮药、枣皮、知母、丹皮、泽泻、茯苓、黄柏）。

久咳不已，移于五腑，病则缠绵难愈，治法仍归五脏。彼无痰干咳，火郁于肺，一言尽之，升提肺气（甘桔汤：桔梗、甘草），生其津液（八仙长寿丹：熟地、淮药、枣皮、麦冬、泽泻、茯苓、丹皮、五味子），斯得之矣。

据经分症，即症分脉，凭脉用药，夫固有历历不爽者。《经》曰：“秋伤于湿，冬必咳嗽”。《经》之所言者，主气也，四气之土，正在秋初当权。

喻嘉言以为湿字疑燥字之误，只知岁气之燥，而不知主气之湿。《经》曰：“脾苦湿”，未闻心肺肝肾苦湿。河间《咳嗽》之篇，以为湿在脾可也，而必分其湿在心、在肺、在肝、在肾何也？

丹溪论咳嗽，有风，有寒，有痰，有火，有癆，有虚，有郁，有肺胀，庶乎近之。

降至景岳，所论外感咳嗽，大半内伤之方居多，所谈内伤咳嗽，止知阴虚一语，虽所重者肾元，四脏亦在内伤之列，何以曾不之及？内伤外感四字，尚未解透耶（自内而出者，喜怒忧思悲恐惊及房劳、饮食所伤为内伤，自外入者，风寒暑湿燥火及瘟疫、痢病所感为外感）。

夫无痰不作咳，无嗽不有痰，一言咳嗽而痰在其中。

《内经》所以有饮无痰，饮留肠胃，不咳不嗽者，自汉儒添一痰字，方书遂将咳嗽与痰，别为两门。究竟扯东拽西，两无分别，书之所以日益支离也。

【解】

外感咳嗽：风寒郁肺——肺浮大。

内伤肺咳嗽——脉短迟。

心咳嗽——脉浮洪。

脾咳嗽——脉濡弱。

肝咳嗽——脉沉弦。

肾咳嗽——脉沉细。

泄 症 脉 论

《难经》训泄有五：胃泄，饮食不化，脾泄，腹胀呕吐。所谓大肠泄者，食已窘迫，可该脾泄论。所谓小肠泄者，便血腹痛。大瘕泄者，数至圜而不便，宜以痢门论，则泄止可言脾胃二经。

诊其脉数，而邪之自外来者，属胃，其气化而为热。轻则黄连厚肠，佐以利水和胃之品（经验方：焦术、云苓、桂枝、黄连、泽泻、猪苓、车前、苡米）。至于完谷不化，则泄之甚者也，须芒硝、大黄（经验方：芒硝、大黄、银花、炙草、姜枣引），涤其邪而泄自止。

诊其脉迟，而虚之由内生者，属脾，其气积而为寒，轻则焦术和中，佐以燥湿补脾之味（经验方：黄芪、白术、云苓、莲肉、法夏、诃子、陈皮、苡米、姜枣引）。

至于胀满呕逆，则泄之剧者也，必附片、干姜（经验

方：黄芪、附片、干姜、焦术、肉桂、莲肉、炙甘草、生姜大枣引），温其寒而泄乃除。

夫泄，显而小者也。以其洩天妙趣而言，则为水先（混沌之初，冲漠无朕，先天一团氤氲之气，降而为水，犹未见其昭著，渐至昭著而生火。犹未有其形质，渐有形质而生木。犹未至于坚实，渐至坚实而生金，土则随之而生。郭璞《葬经》：“洩天妙趣水居先”。《河图》之数：天一生水。

以其承天时行而言，则土为重（坤承天之施，奉以行之，时未至，不敢先时以立始。时既至，不敢后时以堕功。坤道之所以顺也。然载万物者坤，合万物者坤，非有坤以承天，则天亦将虚于所施。故曰厚德至静，无成有终，可知配天之功用者惟坤土独也。正许氏《说文》，重字从土，是以土为重之义）。脾为己土，胃为戊土，一动一静，一阴一阳，互相为用，所以十二官中，各司一职，独脾胃统司仓廩之官。

以其物之资始而论，惟恃动气（战乎乾，战即鼓盪之意，谓资始也。杨子云：“太初者，气之始。太素者，质之始。稟乾之始，出而为动”）。

以其物之资生而论，全仗谷气（致役于坤，役即孳字之意，谓资生也。《淮南子》云：“毛虫则横生，倮虫则纵生。”萃坤之生养而归谷）。脾主消谷，胃主纳谷，一表一里，一刚一柔，还相为质。所以五行宝内，但养一脏，惟脾胃实养性命之宝。至哉坤元，厥惟脾胃。

拟七斗以摩霄（上顶心，心有七窍），高悬西北。

断六鳌以立极（下临六腑），美尽东南。

富媪（《汉书》：后土富媪）敷文，宅中叶蓂元之吉。

媒婆（方书，脾为媒婆）践约，婚媾迨冰至之辰。

卜操柄之有归（《说卦传》：“坤为柄”）应差竖亥（《史记·天官书》：“竖亥步经大章行纬”）。

占括囊之无咎，稳塞夷庚（《左传》：“以塞夷庚”，谓要道也）。

象推吝嗇，义取含章，后得无患乎。先迷方外，必根据直内，以故胃与脾合，马之所以称牝也。脾与胃分，龙之所以战野也。调理得宜，百体从兹而安。调理失宜，百病从兹而起。夫泄，显而小者也。

【解】

泄症——此指脾胃症。

泄——

脉数——邪外来：胃，纳谷	——表里，刚柔相应
脉迟——虚内生：脾，消谷	

脾胃：养性命之宝——

调理宜，百体安
调理失，百病起

水肿脉浮大沉细论

《脉经》曰：“水肿之脉，浮大易愈，沉细难痊。”余谓医不细揣脉与症，斯已难矣。果脉清症确，浮大固可十全，沉细未必难痊。余少时，曾患水肿而回生者，欲知水肿幽明路，说法何妨我现身。

人生饮入于胃，气化之妙，全凭脾肺肾三经。脾专运用之职，肺擅通调之官，肾司熏蒸之用，而后云兴雨施，渗入膀胱。三经失权，其气不化，蓄诸中州，横流四肢，泛滥皮肤，一身之中，无非水为之灌注矣。

以其脉之沉细者言之，脉而沉细，病愈深而侵入脏矣。即脉之沉细分症之阴阳，其为阴水肿也，形寒伤肺，湿寒侵脾，虚寒损肾，大便溏泻，小便清利，脉则沉细而迟，补土以温金，实脾汤（焦术、茯苓、炙草、厚朴、肉桂、草蔻、木瓜、木香、附片、干姜、大枣引），实开斯世之福。壮水兼补火，肾气汤（熟地、茯苓、山药、丹皮、枣皮、淮膝、车前子、附子、肉桂、泽泻），能挽造化之穷。


其为阳水肿也，火盛克金，热郁侮土，燥过枯水，大便坚硬，小便黄赤，脉则沉细而数，石膏友麦冬（经验方：石膏、麦冬、粳米、炙草、大枣、生姜），本草中足称治水之橇（《史记·夏纪》：禹治水，泥行乘橇，山行乘桴。橇，履器之有齿者，今之木屐仿之）。黄连伴黄柏（经验方：黄连、苡米、黄柏、车前、肉桂各三分，知母、炙草），医方内大是分水之犀（《抱朴子》：犀角一尺以上者，刻为鱼形，衔以入水，水即分开）。余尝阅是症，阴阳俱厥，有令人不可测度。阳水之厥，更有十倍于阴水者。阴水误以阳治，先或声哑而死。阳水误以阴治，定是吐血而亡。

至于脉之浮大，邪犹在表，病之最浅者也。水蓄膀胱，五皮饮（五加皮、地骨皮、茯苓皮、大腹皮、生姜皮），可洁清净之府。水行肌表，越婢汤（石膏八钱，麻黄六钱，大枣一二枚，炙草三钱，生姜三钱），足开鬼门之关。其朝宽暮急，暮宽朝急者，水随气之升降也，何必曰阴虚阳亏。上气喘促，夜卧难安者，水淫肺之叶孔也，何必曰子胎母宫。曰风水，曰石水，曰皮水，多其水名，曰湿肿，曰血肿，曰风肿，总是水肿。揣摩脉症，辨别脏腑，沉细浮大，有何难易之分？酌理准情，无非从前所有之语，披肝沥胆，尽是劫

后余生之言。其于是症，煞吃苦辛矣，愁成白发三千丈，历尽洪涛十八滩。

人但知浮大为阳，沉细为阴，而不知沉细中有迟数，即有阴阳。治之之法，相去甚悬。世之患是症者，多为药饵所误，惜不早得是而读之也。

【解】



偏正头痛不问脉论

医有不知其病而不能治者。亦有明知其病而不能治者，有莫解其病而莫能疗者，亦有了解其病而仍莫能疗者。

与哮喘相颞颥而深藏之固，更甚于哮喘者。正头风一症，或数日一发。或数月一发，其发也，突如其来，不因邪触。其止也，诎然而止，非藉药医。揣其痛之根，不越风毒之客于髓海焉。六经皆有头痛。

三阳之经上于头，随其经而医之，药到而痛自除。痛居经络不到之处，恙活、防风，无所施其勇。升麻、干葛，无所竭其力，柴胡、黄芩不能消其事而逐其邪。

三阴亦令人头痛，或痰壅于胸膈（太阴），或气逆于脑顶（少阴），或冷逼乎督脉（厥阴）。而痛不关于痰气与风，南星、半夏，燥其痰。麻黄、附片，温其经。吴萸、干姜去其寒。燥者自燥，温者自温，去者自去，而痛者自痛也。本草牖陈，空对神农而数典。万书案积，莫向仲景而问津。

抑又闻之，剑阁之危险，四面拒敌，而偏以縋入之（邓艾破蜀至阴平，山势险绝，军士不得过，以縋入之）。

偃阳之深固，万夫莫当，而偏以老克之（《左传》：偃阳城小而固，晋荀偃，士匄伐偃阳，入于偃阳，请于荀偃曰：水潦将降，懼不能归，请班师。荀偃曰：“牵帅老夫，以至于此，七日不克，必尔乎，取之五月庚寅”。荀偃，士匄卒攻偃阳，亲受矢石，甲午灭之）。

阅方书，鼻渊称为脑漏。脑可漏之出，亦可注之入，以口服药而经不通者，以鼻注药而窍自通。在拣其解毒去风性味之平正者，淡淡注之（白菊、陈茶煎汤冷注。一方：皂角、细辛，研细末，吹鼻得嚏则解），而痛自渐渐减矣。

以鼻代口，休防郢人之垜（《庄子》郢人鼻端有垜，使匠石斲之，匠石运斤成风，垜去而鼻不伤，郢人立不改容）。

追风拔毒，何假华佗之刀（华佗字元化，汉末沛国谯人，通五经，精方脉，能刮骨疗疾，为外科之祖，有《青囊》书，惜乎无存）。

然此法肇自前人莱菔汁注鼻之方，特取而变化之者。

至于偏头风痛，丹溪以为左属风，属火，多血虚。右属热，属痰，多气虚。用之未必大验。究其根，亦是风毒傍于脑海之旁。病之去路，多从目出而解。

同邑石光南所传淡婆婆一方（淡婆婆根为君，天麻、京子为臣，川芎、白芷为佐，菊花、当归、木贼为使，黑豆百粒引），初起者用之屡效，殊不可解，录之以备急用。

一种手三阳之脉受风寒，伏留而不去者，名厥头痛。入连在脑者，名真头痛。其受邪与正头风无异，而其来也速，其死也速，更有甚于偏正头风者，古无救方，质诸海内名

公，不知家亦藏有秘方否？

石光南家累千金，广为结纳，高人异士过其地者，辄馆于书斋，所得多医书未传之秘方。淡婆婆，又名淡亲家母，未考其性，但尝其味，亦属平淡，草药肆购之。

【解】

偏正头痛——不问脉。

正头风——风毒客于髓海，数日或数月一发。

六经皆有头痛——	┌	三阳经上于头——	随其经而医					
		└	三阴经头痛——	<table border="0"> <tr> <td>太阴——</td> <td>痰壅于胸膈</td> </tr> <tr> <td>少阴——</td> <td>气逆于脑顶</td> </tr> <tr> <td>厥阴——</td> <td>冷逼于督脉</td> </tr> </table>	太阴——	痰壅于胸膈	少阴——	气逆于脑顶
太阴——	痰壅于胸膈							
少阴——	气逆于脑顶							
厥阴——	冷逼于督脉							

鼻渊头痛——外治法。

偏头风痛——风毒傍脑海之旁。

厥头痛——手三阳风寒。

真头痛——受邪同正头风，入连脑。

有甚于偏正头风——古无救方。

心气痛脉论

古传心痛有九，循其名而责其实，纤毫难混。

一曰虫，凡痛，脉多伏，今反洪数者，虫也。厥名曰蛔，长寸许，首尾通红，踞于心窝子，吮血吸精，伤心之患，莫惨于是。以雄黄、槟榔、白矾为丸，杀之而痛自除。

二曰疰，疰者，自上注下也，令人沉沉默默，心中隐隐作痛，甚有疰至灭门户而莫名其病者。脉则乍短乍长，乍涩乍细，非寻常药饵所能疗，惟苏合丸（麝香、沉香、丁香、

檀香、香附、萆薢、白术、诃子、朱砂、青木香、乌犀角各二两，熏陆香、龙脑各一两，安息香二两，另为末，用无灰酒熬膏，右为末，用安息香膏加炼蜜为丸。每两十丸，蜡包裹，温水化服），阿魏膏（楂肉、胆星、法夏、麦芽、神曲、黄连、连翘、阿魏、薤仁、贝母、风化硝、枯碱、萝卜子、胡黄连，右为末，姜汤浸，蒸饼为丸，相其本体之强弱寒热，体强而热，阿魏丸，体弱而寒，苏合丸），庶可以治。

三曰风，风得火而益炽，火得风而愈威。风而入于心，则痛之猝者也。其脉浮紧而数，以白菊、白矾为君，侯氏黑风散（白菊五钱，白矾钱半，防风、白术、桔梗各八分，人参、茯苓、当归、川芎、干姜、细辛、牡蛎各三分，共为末，温酒调），可采也。

四曰悸，有触而惊曰惊，无触而惊曰悸，悸而至于痛，则悸之甚者也。其脉虚而滑，加乳香、没药为使，李氏养心汤（黄芪、茯苓、当归、川芎、法夏、甘草、柏子仁、枣仁、远志、五味、人参、肉桂、乳香、没药、姜枣引），盍用之。

五曰食，食入于胃，停滞未化，攻冲作痛，其脉短而涩，平胃散（苍术、厚朴、陈皮、炙草），洵为对症之方。

六曰饮，饮入于胃，攻注无常，激射作痛，其脉濡而迟。五苓散（猪苓、茯苓、焦术、泽泻、肉桂），实为导水之剂。

七曰冷，寒气犯于绛宫，脉则或迟或结，吴萸、川椒、砂仁、木香止痛，书何难共证（经验方：木香、砂仁、肉桂等分为末，每服五分）。

八曰热，火气郁于胸膈，脉则或数或促，生地、栀子、

黄连、苦楝，除痛药确有明文（经验方：黑梔仁一两，干姜一钱五分，炙草一钱五分）。

九曰去来痛，经脉周流，有碍则痛，过其所碍而旋止，巡至所碍而复发。气充血足，何碍之有，不必诊脉，补之可也（经验方：黄芪、焦术、肉桂、当归、法夏、陈皮、茯苓、炙草、姜枣引）。

顾同是心气痛也，以虫之伤人最酷者，居首。以疰之伤人最隐者，居二。以风之伤人最速者，居三。以悸之介在可以伤，可以无伤者，居四。以饮食之不轻伤人者，居五六。以寒热之恒有者，居七八。以去来痛之人皆知而能治者，居九。想古人位置之宜，亦大费踌躇矣。

然名则列之有九，而义实本之于《经》。曰虫痛者，《经》言蛔蚘心腹痛也。曰疰痛者，如飞尸、遁尸之类也。曰风痛者，《经》言肝心痛也。曰悸痛者，手少阴之脉，起于心中也。曰食痛饮痛者，足太阴之脉，其支上膈注心中也。曰冷痛者，寒气客于背膂，注于心也。曰热痛者，寒气客于经脉，与热相搏也。曰去来痛者，《经》言气不宜通也。要皆非真心痛也。若真心痛，手足冷至节，旦发夕死，夕发朝亡。彼医家所传之方，大半言止冷痛。本草所注之性，间有止热痛之语。

夫冷热之痛，病之最浅而最易辨者，诸书尚且聚讼，何况痛之至隐而至僻者乎。领会《灵》、《素》微词，才是医家学问，变化本草训语，方知用药权衡。

【解】

九种心痛：脉	虫——	洪数
	疰——	乍短乍长，乍涩乍细
	风——	浮紧数
	悸——	虚滑
	食——	短涩
	饮——	濡迟
	冷——	迟，结
	热——	数，促
	去来——	不必诊脉，可补

腰痛脉论

《脉要精微论》曰：“腰者，肾之府，转移不能，肾将惫矣”。《经脉篇》曰：“足少阴之别，名曰大钟，实则闭癰，虚则腰痛”。《刺腰痛篇》曰：“足太阳脉，令人腰痛”。细考《内景传图》，腰为肾经所居之地，膀胱经所过之区，腰痛只此二经。彼足厥阴、足阳明、足少阳经，本不行腰，而言腰痛者，牵引而痛也。方书所辨，未尝分别其经。世医所治，止及肾虚一语。夫肾与膀胱，一表一里，邪之自外来者，尽属太阳之腑。痛之自内生者，总归少阴一经。

诊其脉之沉细者，而知其痛在少阴焉。时痛时止者，房劳耗其精也（熟地、淮药、枣皮、泽泻、粉丹、茯苓、杜仲、牛膝）。

枕衾灿烂，心迷解语之花（唐《天宝遗事》：太液池千叶莲盛开，帝与妃子共赏，谓左右曰：“争似此解语花”）。

云雨苍茫，神醉游仙之梦（《高唐赋》：“昔者，先王尝游高唐，怠而昼寝，梦见一妇人曰：‘妾巫山之女也，为高唐之客，闻君游高唐，愿荐枕席’”）。

时痛时热者，浓味熬其水也（熟地、淮药、枣皮、茯苓、泽泻、丹皮、黄柏、知母）。

山笋湖蒲，总无下箸之处（《晋书》：何曾日食万钱，对案尚无下箸处）。

脍鲤包蟹，翻为适口之资。

痛着不移者，闪挫竭其力也（经验方：熟地、丹皮、当归、杜仲、续断、淮膝、桃仁）。

重举千钧，自诩扛鼎之力（《汉书》：项羽力能扛鼎）。

奇经百验，空传刮骨之文（见华佗注）。

填骨髓而补真阴，为少阴之主药，厥惟地黄，调和补泻，燮理阴阳，实为护国之臣。

诊其脉之浮紧者，而知其痛在太阳焉。刺痛背肉者，风淫于肾腧穴也（经验方：麻黄、独活、细辛、防风、当归、酒芍、生地）。

伛偻而行，偏铭考父之鼎（《左传》正考父之鼎铭曰：“一命而伛，再命而偻，三命而俯，循墙而走”）。

痾痿在望，也承丈人之蜩（《庄子》：仲尼适楚，出于林中，见痾痿者，承蜩犹掇之也，顾谓弟子曰：“用志不分，乃凝于神，其痾痿丈人之谓乎。注：痾痿，曲背，承蜩，以竿粘蜩）。

郁痛畏冷者，寒客于气海腧也（经验方：麻黄、附子、细辛、当归、炙草）。

闲坐凄凉，滥厕楚宫之女（楚王爱细腰，宫女多有不食

以求瘦其腰者)。

幽居泔冷，空披齐国之纨（梁简文帝启鲁縞齐纨，藉新香而受彩。梁元帝谢赉锦，启鲜洁齐纨，声高穀趙）。

痛重难移者，湿着于藏精所也（经验方：麻黄、苍术、杜仲、淮膝、焦术、当归、茯苓、苡米、炙草）。

举止维艰，已作支离之态（《庄子》：“支离疏者，颐隐于齐，肩高于项，会撮指天，五管在上，两脾在胁”。注：支离，驼子。疏，人名。会撮，发髻）。

屈伸莫遂，且无辗转之嫌。

调血脉而通关窍，为太阳之主药，实为麻黄，驱逐客邪，通行经络，允推先锋之将。少阴不轻痛，太阳之痛居多，所以《内经》麻黄之症特详，今人所治，动曰地黄症，盍取《内经》而细玩之也乎？

【解】

腰痛—
 足少阴——痛自内生
 足太阳——邪自外来，太阳腑

脉—
 沉细——痛在少阴，少见
 浮紧——痛在太阳，多见

脚气痛脉论

诸痛忌补，脚气痛尤甚。名曰壅疾，壅者，湿气堵截经络之谓，顾其名可以思其义。

有为寒湿壅者，人迹板桥（温庭筠诗：“鸡声茅店月，人迹板桥霜”，身历冰霜之惨。

江深草阁（杜甫诗：“五月江深草阁寒”），泥多滑涎之

侵。

冷凄之气，下注为湿，浸淫筋骨，昼夜憎寒作痛，其脉濡而迟。非苍术、加皮，不足以燥劳筋之湿。非干姜、附子，不足以祛切骨之寒（经验方：苍术、加皮、羌活、防风、防己、附片、干姜、当归、苡米、木瓜、炙草、大枣）。

有为湿热壅者，餐瓜嗜果，惟贪口腹之甘，旨酒佳肴，不顾肺肠之腐。熏蒸之气，下流为湿，煎熬阴血，临夜发热而痛，其脉濡而数。惟淮通、苏梗，庶可以疏闭塞之经。惟黄柏、麦冬，庶可以清蕴隆之热（经验方：淮通、苏梗、黄柏、麦冬、生赤皮、当归、羌活、防风、苡米、木瓜、炙草）。


有为风湿壅者，湿郁为热，热则生风。其痛也，走注无常，辄肆其毒，中于踝，肿则载涂若跣（《书·说命》：若跣，弗视地，厥足用伤）。中于胫，伸则割痛如刀。中于膝，形则盖大如鹤。其脉濡浮而数。必也大黄芒硝退其火，而风斯息。防风、羌活散其风，而湿乃除（经验方：大黄、芒硝、羌活、防风、当归、生地、牛膝、淮通、炙草、姜枣引）。

斯三者，本非废疾，而多致成废疾者，补误之也。跛倚以为容（《礼记》：有司跛倚以临祭）。许多书斋秀士，蹒跚不自便（《史记》：“子若蹒跚”，言足欲进而趑趄也），偏及绣阁名姝，究其受害之由，无非流俗所尚温补，医者之所为也。

外有一种蹇缩枯细，不肿而痛，名曰干脚气痛，有润血清燥之方。又有一种足跟作痛，焮肿而红，名曰阴虚脚痛，有补肾养营之剂。验其症，或肿或痛。审其脉，为涩为细，

可考而知，与湿有大不相侔者。治是症者，勿藉口斯二症而任意补之也可。

【解】



脉涩细——阴虚脚痛：补肾养阴。

消渴从脉分症论

《经》曰：“二阳结（足阳明胃，手阳明大肠），谓之消”。同一结也，而气分，血分判焉（病在气分则渴，病在血分则不渴。消渴以渴为主而判气血，血分亦有渴者）。气分结者，病发于阳。血分结者，病发于阴。二症相反，如同冰炭。

其发于阳也，阳明被火煎熬，时引冷水自救，脉浮洪而数。其发于阴也，阳明无水涵濡，时引热水自救，脉沉弱而迟。

发于阳者，石膏、黄连，可以折狂妄之火（石膏、知母、炙甘草、黄连、粳米），人所共知。发于阴者，其理最为微妙，非三折其肱，殊难领会。人之灌溉一身，全赖两肾中之水火（津液发源于华池，涌于廉泉，为甘露，为琼浆，以养百骸。华池，两肾中先天之祖窍，水火朕兆处。廉泉舌下二穴名），犹之甑乘于釜，釜中水足，釜底火盛，而甑自水气交流。倘水涸火熄，而甑反干枯缝裂，血分之渴，作如是观。当此舌黑肠枯之时，非重用熟地，不足以滋其水。非重

用附桂，不足以益其火（八味汤：肉桂、附子、熟地、山药、枣皮、泽泻、丹皮、云苓），火炽水腾，而渴自止。

余尝治是症，发于阳者，十居二三，发于阴者，十居七八，用桂附多至数斤而愈者。彼本草所注，无非治气分之品，而治血分之药性，不注于本草，方实始于仲景，至喻嘉言而昌明其说。

上消如是，中下消可类推矣（胃热多食善饥为中消，肾热渴而小便有膏为下消，治法仍分气血，下消小便甜者难治，水生于甘而死于咸，小便本咸而反甘，是脾气下陷肾中，土克水而生气泄也）。昔汉武帝患是症，仲景进桂附八味汤，服之而愈，因赐相如，服之不效。或曰：相如之渴，发于气分。或曰：相如为房劳所伤，非草木之精华所能疗，武帝不赐方而赐以金茎露一杯（李商隐诗：“侍臣最有相如渴，不赐金茎露一杯”），庶几愈焉，未可知也。

【解】

脉浮洪数——发于阳：病气分，渴。

脉沉弱迟——发于阴：病血分，不渴。

呕 吐 脉 论

呕吐之症，一曰寒，一曰热，一曰虚。寒则脉迟，热则脉数，虚则脉虚，即其脉可以分其症。

最易治者，寒。阳明为消磨五谷之所，喜温而恶寒，一自寒犯于内，两相齟齬，食入即吐，不食亦呕。彼法夏、丁香、白蔻、砂仁，本草所注一派止呕定吐之品，非不神效，不如一碗生姜汤，而其效更速者，经所谓寒气客于肠胃，厥

逆上出，故痛而呕是也。

最误治者，热（寒凉燥烈之性，功过参半焉者也。丹溪滋肾水而清湿热，原补前贤所未备，乃效颦者，肆行寒凉。人之死于寒凉者，非丹溪之罪。实不善读书者之罪，有明诸儒救寒凉之弊，多为过激之言。二百年中，寒凉之风，一变为燥烈之火，人之死于燥烈者，十倍于寒凉。遇是症，彼曰宜热，此曰宜热，且曰某书某书。凿凿有凭，又安知症属热乎哉？）

寒之不已，郁而为热，医不知其热，仍以辛热治其寒，愈呕愈热，愈热愈吐，彼麦冬、芦根，止呕定吐，书有明文，尚不知用，何况石膏之大凉大寒乎（经验方：石膏、麦冬、粳米、炙草）？不知石膏为止呕定吐之上品，本草未注其性，《内经》实有其文。《经》曰：“诸逆上冲，皆属于火，诸呕吐酸，暴注下迫，皆属于热”是也。


最好治者，虚。不专责之胃，而兼责之脾。脾具坤静之德，而有乾健之运。虚难转输，逆而呕吐。调理脾胃，乃医家之长策，理中汤（人参、焦术、干姜、附子、炙草、大枣），六君子汤（人参、焦术、法半夏、茯苓、陈皮、炙草），皆能奏效。

《经》曰：足太阴之脉，挟咽连舌本，是动则病舌本强，食则呕是也。夫呕吐，病之最浅者也。噎膈，病之至深者也。极为易辨。呕吐，其来也猝。噎膈，其来也缓。呕吐，得食则吐，不食亦有呕吐之状。噎膈，食入方吐，不食不呕。呕吐，或寒或热或虚，外见寒热与虚之形。噎膈，不食亦与平人一般。呕吐不论年之老幼，噎膈多得之老人。呕吐，脉有迟，有数，有虚。噎膈，脉缓。

方书所论呕吐，牵扯噎膈之文，噎膈半是呕吐之方，有何疑似之难辨而茫无定见也。昔在湘中，壶碟会友，一老医曰：“吾治噎膈，得愈数人”，核其药，曰附子理中汤，考其症，乃脾虚之呕吐者。又一老医曰：“吾治噎膈，得愈数人”，核其药，曰黄连法夏汤，考其症，乃胃热之呕吐者。谚云：“药能医假病，人多得假名”，其即二老之谓欤。至于老人气衰，时尝呕吐，不可概以呕吐论，亦不可遂以噎膈论。盖津少气虚，难以传送，古人刻鹄于杖，祝其无噎者，此也。

孕妇呕吐，法夏不犯禁例，且能安胎，《准绳》已详言之。更有妇人，天癸来时，为风寒所袭，传送肺经，血凝于肺，食入即呕，一载有余，医家以寻常治呕吐之法治之，或寒或热，俱不见效，只以桔梗、红花诸药，去瘀生新，数剂而愈，此又不可不知也。

【解】



噎膈脉——缓，与呕吐异。

痿症不从脉论

《内经》痿论与痹论、风论，分为三篇，病原不同，治法亦异。方书多杂见于风痹论中，将《经》文混淆，后学迷离莫辨。按四体纵弛曰痿（《经》曰：肺热叶焦，则皮毛虚竭急薄，着则生痿躄。又曰：带脉不引，故足不用。《经》

之所言者，止痿于足耳，而分筋、肉、骨、脉痿。道人治之而愈者，则不止于足，而有头痿、腰痿、手痿、一身俱痿，其论形体枯泽，亦与《经》论稍有差池，而其治法，仍不外乎《经》义，不过于润燥活血队中，少加桂为之向导。篇中所论，以所见言），与风相近，而实相远，不仁不用，究非痿非痹（《正字通》：“瘫痪，四体麻痹，筋脉拘急”，按诸医书，发于左为痿，发于右为痹，男多发左，女多发右），不痛不肿，实非瘰非痼（筋急而缩为瘰，筋弛而缓为痼，伸缩不已为瘰痼。按：痼、弛之痼，外见风症）。

有即发即愈者。有历一二日方愈而复发者，有周年半载而不愈者，语言依然爽朗，神气依然清明，饮食形体依然不变不减，令医有莫知所适从者。

考本草所注，黄柏、苍术为治痿之要药，医多不解，不敢经用，而以为脾主四肢，纯以补脾温脾之品治之，致痿成终身者比比矣。间亦有幸用而获效者，只知病之愈而不知病之所以愈。盖读《内经》而恍然焉，《经》曰：“治痿独取阳明”。阳明主润宗筋，为湿热所伤，宗筋不润，弛而不能束骨，发而为痿。苍术陡健阳明经，黄柏清热而坚骨，药到病除，而后叹，古人名为二妙，实有妙不可言者。

夫病源不清，见其方而不敢用其药。病源即清，推其类可以尽其余。


麦冬能治痿者（经验方：麦冬、梗米煮粥），湿热蒸肺，肺叶焦而难以宣布。

干地黄能治痿者（经验方：干地黄四两，黄柏一两，知母一两，肉桂一钱，炼蜜为丸），湿热伤血，血脉涸而不能养筋。

本草所注，可以清热而凉血者，皆可以治痿也。

病自我识，方自我立（书传古方，为后人之法程，明君臣之义。补泻之理，非谓即以其方治病。南北之水土不同，古今之时势不同，年齿之老幼不同，冬夏之寒奥不同，赋禀之厚薄不同，气质之清浊不同，境遇之顺逆不同，是在为医者运用之妙，在乎一心，有是症必有是方），即不用黄柏、苍术可，即倍黄柏、苍术亦可。其或兼风、兼痹、兼虚，杂用治风，治痹，补虚，有何不可？至于脉，置之勿论可也。

【解】



风痹脉论

病有明医能治，草医能治，而大医不能治者，风痹也。痹者，闭也，谓兼寒湿闭塞经络而痛也。《内经》所以有风

胜、寒胜、湿胜之分，而有行痹、痛痹、着痹之语。

诊其脉浮紧而弦，要归于风，病发肝经，殃及肢体。中于骨则伸而不屈，中于筋则屈而不伸，中于血则凝涩而不流通。治之之法，羌活、防风疏其风。紫苏、青皮行其滞。加皮、黄柏坚其骨。苡米、木瓜舒其筋。苍术、防己燥其湿。松节、茄根散其寒。人参、白术补其气。生地、当归活其血。有杂合之症，斯有杂合之方（经验方：羌活、防风、石膏、侧柏叶、黄松节、苡米、木瓜、当归、炙草、生地黄）。

倘郁而为热，脉数无伦，又当大泄其热。闭而积寒，脉迟不来，又当重温其经。

所谓明医者，黑籍除名，丹经注字，儒、释，道心归一贯，天、地、人理统三寸，名山考道，面壁九年，胜地棲身，足濯万里。其于是症，外有烛照五运六气之淫邪，内有以洞鉴五脏六腑之亢害，用风药为君，有用至数斤而愈者。用大黄泄热，有用至数斛而愈者。用附子温经，有用至数斛而愈者。大医见而咋舌，草医见之而倾心也。草医何以敢与明医抗衡哉？是症经验之方，有用之一世者，有用之二世者，有用之三世者，奇货可居，匪伊朝夕矣。

采药于深山虎穴（《汉书》，班超曰：“不入虎穴，焉得虎子？”）。

蚕丛（《成都记》：“蚕丛氏，蜀君也”。李白诗：“见说蚕丛路，崎岖不易行”）不辞登陟。

教子于密室，鸦涂（卢仝诗：“忽来案上翻墨汁，涂抹满书如老鸦”）。蚓迹（唐太宗《王羲之传》论肖子云：擅名江表，然无丈夫气，行行若萦春蚓，字字如绾秋蛇），大费踌躇。

购米市盐，信是传家之宝，枕流漱石（晋孙楚欲隐居，误云“枕流漱石”，王济曰：“流可枕，石可漱乎？”楚曰：“枕流欲洗其耳，漱石欲砺其齿”），希图待聘之珍。

想其附耳低言，吾祖如是，而屡效焉。吾父如是，而屡效焉。吾身如是，而屡效焉。一卷之书，不从理解得之，不从药性得之，而从经验得之。

乃知岩谷生苗，必非无故，举凡玉女（《尔雅注》：以葛，蔓生有芦，任东呼为龙尾，亦谓之虎葛，细叶赤茎），睽姑（《尔雅注》：钩瓠也，一名王瓜，实如瓠瓜，正赤味苦），鸡头鸭脚（《洛阳伽蓝记》：牛筋狗骨之木，鸡头鸭脚之草，亦备细焉），无非逐风燥湿祛寒之品，妙手所得，适与是症相当，而与明医吻合，所以大医见草医而惊讶，明医见草医而肃然起敬也。

世之所称大医者，我知之矣，非医大也，补大之也。补何以大？药大而医亦大耳。其出门也，依轻策肥，扬鞭周道，意气可谓都矣！其诊脉也，凝神闭目，兀坐终朝，经营可谓苦矣。其开方也，咀笔濡毫，沉吟半晌，心思可谓专矣。及阅其所撰之单，黄芪、白术、附子、干姜，诂知热得补而益烈，寒湿得补而益凝，辗转纠缠，酿成不用，可胜悼叹，盖尝微窥底蕴，其素所挟持者然也。咄咄逼人，独会医门之捷径；扬扬得意，别开海上之奇方，原未梦见何者为脾胃，何者为命门，开口不曰脾胃土败，便曰命门火衰。

本草千百味，约之不满十味。古籍千百方，算来只用两方。何分内外之伤口，概归一补。不论阴阳之症，总是一温《灵枢》、《素问》，一笔可勾，《汤液》（本草名，伊尹著）《难经》，百年难学。汉唐宋元之书，许多阐发。张朱刘李之

论，徒事铺张。从来医书万言，记得仅有三言。人心七窍，剖开全无一窍。


彼冬虫语冰（《庄子》：夏出不可以语于冰者，笃于时也），徒知有寒，不知有热。

方诸春蛙坐井（《庄子》：“井蛙不可以语于海者，拘于墟也”。韩愈《原道》篇：“坐井而观天，曰天小者，非天小也”）。不知有石（与实同音），只知有墟（与虚同音）。

可惜英雄将相，枉罹非辜。剧怜才子佳人，空伤不禄。午夜鸡鸣，不作回头之想，半生马迹，悉是饶舌之方（结饶其舌而不能饮食，不能言语）。

大医所以见，明医引身而避。草医见大医，而羞与之为伍也。噫，明医不世有，草医不敢用，大医之流毒，宜乎众矣。

【解】



老痰不变脉论

天下怪怪奇奇之症，诊其脉，依然圆静和平者，老痰也。夫痰之名不一，其源亦不一，皆足以变脉，惟老痰隐伏于肠胃迴薄之处，不关五脏，不伤六腑，故脉不变，但年积久而作祟，以余所亲自阅历怪病百出者言之。

有耳初闻蝉鸣声，次闻风雨声，久之闻雷霆声音。

有目初见房屋倚斜，次见山川崩裂，后见平地沉陷者。

有喜闻吉祥语，如言乡会试擢，词林点状元，则神完气足，手舞足蹈。倘闻言凶事，如疾病灾难，死丧之类，则气绝神消而死者。

有自觉一条虫，由头走至背，自背走至胸，若痛若痒，手莫可支者。

有日见一个白鼠，由壁走上梁，由梁走地下，呼人打鼠者。

有日见一个白猫儿，时走堂前，时伏书案，狮子尾，毛长寸许，润泽丰满，性驯可爱，招人观玩者。

有旦昼安静，无异平人，夜不上床，时寐时寤，语言支吾，欲两三人陪坐以待旦者，有日则举动如常，饮食如旧，临夜病症百出，莫可名言，呻吟床褥，直到天明者。

有静坐一室，只许妻儿相见，若见他人，心惊胆怯，无地躲避者。

有见物与平人无二，及见小儿，止数寸高，大人不过尺许者。

有神充气足，到晚自揣必死，将家事一一吩咐妻儿辈，渐渐神消气馁，俨然死去，醒则仍复其元，或数日一发，一月一发者。

有睡至半月方醒，醒则气体强健，饮食倍进，不过两三日，睡如初者。

有一月方食，气血不减，精神少衰者。

皆窃取王隐君滚痰丸治之而痊愈者也（滚痰丸：青礞石一两，沉香五钱，酒大黄、酒黄芩各八两，右将礞石打碎，

用焰硝一两，同人瓦罐内，盐泥固济，晒干，火煅，石色如金为度，研末合诸药，水丸，临卧时每服二钱五分，生姜送下），惜王隐君制其方，未言及于脉，医无所据，不敢轻用。

吾邑蒋渭浦（讳熊藻）著《九门奇方书》，以痰门居首，独推此方，实为隐君之功臣，亦未会通乎脉，止可一人用之，而不可与众人共用，遂使其书其方，度之阁上，不大盛传。苟知以脉证病，用滚痰丸直行无所事耳。世之患怪怪奇奇之症者，一旦值此而沉痾顿除，王隐君济世之婆心，得以阐明于世，即吾邑蒋渭浦创书之美意，亦幸当代之有传人矣。

【解】

老痰——脉平和，而有怪症。

老痰——隐伏肠胃迴薄处，不关及脏腑，故无脉变。

痫症脉论

诸痫病发，卒倒抽掣，叫吼吐涎。因其声之似，而有猪痫、马痫、羊痫、牛痫、鸡痫之分。溯其源，卒倒无知者，痰迷心窍也。搐搦抽掣者，风入肝经也。名虽不一，不外心肝二经。

《经》曰：“脉滑大，久自己。脉坚小，死不治”。

有得之胎前者，儿在母腹，其母猝然受惊，痰气逼入心肝，与本来气血搏结成窠，此不可治者也。

有得之怀抱者，小儿心肝有余，神气不足，偶有所触，风动于肝，火发于心，神不守舍，痰涎蔓延，浸淫乘其隙而入之，据以为主，此介于可治不可治者也。

有得之成人者，外感风寒，内伤饮食，逆于脏气，闭塞

诸经，郁而生痰，胶固心肝，此无不可治者也。

夫有桀骜不驯之虏，必恃斩关夺隘之才。有顽梗难化之梟，必须执锐披坚之勇。盖负嵎劲敌，非诗书所能启牖，仁义所能渐摩，礼乐所能陶淑，不得不挽强弓，操毒矢，以摧其锋而捣其窟。


痰之凝结心肝，亦由是也，彼挟心肝以淬其锋，温之而余氛愈炽。据心肝以完其窟，和之而固垒难降。且胁心肝以成其党而树其敌，补之而邪焰鸱张。求其剽悍之性，直抵巢穴而能杀伐者，其惟礞石与麝香乎。可以拨乱而反正，能平肝下气，为治惊利痰之圣药。

余于是症，胎病无论已，小儿未曾诊视，稍得成人，但脉浮大，概以礞石滚痰丸，麝香丸攻之，日服六君子汤一贴，得愈者无数。有服至一月愈者，有服至两月愈者。以痰尽为度。《经》曰“有故无殒，不信然欤。”

《难经》训颠为僵仆直视，与痫无异。进阅《内经》颠狂篇，亦大同小异。

以为痫即颠者，非也，《内经》明有三条之论。以为痫不同于颠者，亦非也。所言颠痫两相仿佛，故阙之以俟参考（麝香丸方：法夏、胆星、陈皮、枳实、麝香、云苓、青皮、炙草、生姜汁为丸。一方治小儿乳疳：姜虫伴糯米，浸去浮沫，去米焙干，研细末，米汤调服）。

【解】



哮喘脉乱无妨论

《内经》有喘无哮，至汉方哮喘并论。喘之源不一，哮之源止有冷痰入肺窍而已。

夫肺为娇脏，清虚之质，不容些毫芥蒂悬于胸间，其窍仰上，一有所入，则不能出。人而饮冰食果，积成冷痰，浸淫于内，是为痰母，物交物则引之而已矣。一为潮上，肺窍为之闭塞，呼吸乱矣，呼吸乱而二十七脉之迭见而杂出者。无所不至。

其遇寒而发者，寒与寒感，痰因感而潮上也。其遇热而发者，寒为热蒸，痰因蒸而潮上也。必待郁闷之极，咳出一点如鱼脑髓之形而症斯愈，脉亦随之而平。

本草所训，性味猛烈，惟麻黄、砒石，可以开其关而劫其痰。麻黄能发汗，一到哮喘，虽盛夏之月不发汗。砒石能伤人，一至哮喘，虽羸弱之躯不伤人，有是症有是药而卒不能除其根者，麻黄能通痰塞之路，而不能拔痰踞之窠。砒石能剿痰招之党，而不能歼痰伏之魁。药到即愈，愈而复发者，此也。

余尝见老人患癆伤咳嗽吐血，体瘦脉数，败症备矣。询其素有哮喘，癆无可治者，以二药治其哮喘得愈者数人。又尝见老人患上气咳嗽，喘闷脉急不寐，困顿极矣，问其素有哮喘，癆无可治者，以二药治其哮喘，得愈者亦数人。瑶池古冰雪，为肺拟冷痰，斯言近之矣。

制砒石法：以淡豆豉晒干研末一两，砒石一钱，饭和为丸。

(刺史家节庵，历宦四十年，解组归里，年已七十矣，患哮喘不寐，服麻黄而愈，重一本之亲，招诸玉，砌结三生之愿，得聆金音，雅意殷殷，命著是篇)。

【解】

哮喘——肺窍闭塞，呼吸乱，二十七脉迭见杂出，咳唾后脉平。

温病脉论

冬月伤于寒，即病者为伤寒，不即病而伏藏于中，至春随阳气发见者为温。其症头痛项强，与伤寒无异，惟初起不恶寒便发热，脉数为异耳。

伤寒由表入里，不得不先发其表。温病由里达表，不得不先清其里，所以温病有误汗而无误下之语。

仲景著《伤寒》一书，自秋分后至春分前止，若春分后，则为温矣。《内经》虽有先夏至日者为病温之文，仲景虽有太阳病先发热者为温之论，晋唐以来，无人剖晰伤寒、温病，概以《伤寒》书治之，得失参半。

治此症者，茫无主张，延至于金刘河间出，始著《温论》。有明喻嘉言复畅其说，温病乃有圭臬，而仲景之书，亦得以昭著于世。


当此韶光明媚之天，三阳出于地上（十月纯阴用事，在卦为坤，至十一月黄钟应律，为复，卦则一阳生。十二月太吕应律，为临，卦则二阳生。正月太簇应律，为泰，卦则三阳生），日丽风和，花香鸟语，一片春温之气，盎盎蓬蓬（盎盎，和蔼之状。蓬蓬，司空图《二十四诗品》：“蓬蓬远

春”)故病亦名之曰温。

轻则白虎汤(人参、石膏、粳米、知母、炙草)、黄芩芍药汤(黄芩、芍药、炙草)、葛根升麻汤(升麻、葛根、芍药、炙草),重则三承气汤(大承气汤:大黄、芒硝、厚朴、枳实。小承气汤:大黄、厚朴、枳实。调胃承气汤:大黄、芒硝、炙草),无不应验。间亦有先恶寒而后发热者,仍以伤寒治之。

又曰:“冬不藏精,春必病温”。盖冬主闭藏,漏泄春光(杜诗:“漏泄春光有柳条”)。邪之所凑,其气必虚。古人婚姻六礼,定在桃夭之时,良有以也。余则谓热蕴之极,必致煎熬肾水,遇体之充足者,但以前汤治之。倘体之虚怯者,不问精之藏与不藏,前汤中重加生、熟二地,以培其本(生地、熟地、黄芩、芍药、贝母、生草),则二说不相歧而相为用矣,何必如喻嘉言之分疏,其说也乎。

【解】



暑热脉论

同是夏月病也，头痛，身热，面垢，自汗，而暑热分焉。暑为阴邪，热为阳邪，观于天地可知矣。

炎风翕歔，草木荣而就枯，烈日熏蒸，沟洫盈而立涸。阳气发散于外者，底里必然虚空。源远之井，清冷如冰。岩谷之风，寒凄若刺。人，一小天地也，深居房室静坐，不啻趋炎，奔走道涂，周行常思荫暍。阳气发泄于外者，底里亦必虚空，举动心艰，肢体疲倦，居恒气短，精力衰颓。故其为病，亦因其气而感之耳。

其中暑也，感地窍之气，阴与阴遇，头痛身热，面垢自汗，与中热无异。而小便清利，大便溏泻，呕吐少气，安静好眠，脉则虚怯（亦有虚数者），较之中热，大相径庭焉。

暑必伤气，非黄芪不足以益其气。暑必兼湿，非焦术不足以燥其湿。暑必积寒，非附子不足以温其寒（经验方：附子、焦术、黄芪、干姜、苡米、扁豆、云苓、炙草），洁古曰：静而得之为中暑是也。

其中热也，感天炎之气，阳与阳遇，头痛身热，面垢自汗，与中暑无异，而小便赤涩，大便坚硬，胸满气喘，烦躁不眠，脉则洪数，较之中暑，殊隔天渊焉。

热甚发燥，非麦冬不足以清其燥，热甚为毒，非黄连不足从解其毒。热甚涸水，非猪苓不足以利其水（经验方：麦冬、黄芩、泽泻、焦术、猪苓、茯苓、前仁、炙草），洁古曰：动而得之为中热是也。

五行之中，惟火有二，所以五运而有六气也，有六气，

因有风热寒暑燥火，六淫热即火病也。方书所注，有谓暑为阳邪，心属离火，故暑也入心，吾不知将热置于何地？有将暑分阴症阳症，而火则牵扯诸火，亦知火乃六淫内之火乎？有以暑为夏月之伤寒，吾不知暑又是何病？千书一律，开卷茫然，总于五运六气，未能细心体认。余因参互考订，力为剖别，验之于症，实有毫发不差者。

【解】

暑——阴邪
热——阳邪

——因其气而感：阳气发散于外，内虚

中暑——感地之气——阴与阴遇
脉虚怯，虚数

——静而得之

中热——感天炎之气——阳与阳遇
脉洪数

——动而得之

痢症脉论

痢有不与世相递嬗，而名则因时而变易。方策所传，其来有自，不容不据古以准今。《素问》谓之肠澼，《难经》谓之里急后重，汉谓之滞下，晋谓之秋燥，至唐方谓之痢。即其名而绎其义，便血曰澼，痛甚曰急，壅塞曰滞，皱裂曰燥，不利曰痢，痢之情形已显示于名称之表。历代以来，扬摧指陈，不啻以暮鼓晨钟，发人深省。

治是症者，顾可孟浪从事，翻欲絨膝扃镬（《庄子》：将为舐筐探囊发匮之盗，而为守备，则必摄絨膝，固扃镬，此世俗之所谓知也。“然而巨盗至，则负匮揭筐，檐囊而趋，惟恐絨膝扃筐之不固也”。注：舐，开也），而置之死地乎，

当此暑炎方退，金飏初起，土间其中（土旺于四季，五六得天地之中，以未土为正），热燥湿汇于一时，三气凑而为病。

有时行者，从皮毛入，微恶寒，腹痛，泻尽宿食方转红白。风之所过，行于一家。则病一家，行于一境。则病一境，有传染者，从口鼻入，不恶寒，腹痛，随泻宿食即转红白。气之所触，染于一人，则病一人，染于一方，则病一方。

于斯时也，抚枕席而兴嗟，何分男女。

如厕坑而抱痛（《左传》：晋景公有疾，将尝麦，如厕，陷而卒），莫测死生。

天气阴晴，垢闻一室，灯光明灭，呻彻五更。

饫膏粱者无论已。可怜寒士当灾，朋尽回车，难邀甲戌之峙（《书·费誓》：甲戌峙乃糗粮）。

人皆掩鼻，徒传庚癸之呼（《左传》：吴与鲁会，吴子不与土共饥渴，大夫申叔仪乞粮于鲁，大夫公孙有山氏对曰：“粮则无矣，粗则有之，若登首山以呼曰‘庚癸’，呼则诺”。杜注：“军中不得出粮，故为隐语，庚，西方，主谷。癸，北方，主水”）。

聚桑梓者，犹可也。最苦旅人远适，今雨不来（杜甫诗：“旧雨来，今雨不来”），谁恤零丁异地（文天祥诗：“惶恐滩头说惶恐，零丁洋里叹零丁”）。

闻风争避，哪管客子离乡。

儒者考古今之得失，证一己之功修，于是证而果参上乘焉，本来恻隐之心，自应以之普度也。

喻嘉言曰：“初用辛凉以解表，次用苦寒以清里”。

刘河间曰：“气调则后重自除，行血则脓血自止”。

余于痢之时行初起者，而宗嘉言焉。疏经络而驱邪，败

毒散（人参、羌活、独活、柴胡、前胡、川芎、枳壳、桔梗、茯苓、炙草），克壮元老之猷。

于痢之传染初起者而宗河间焉，和营卫而导滞，芍药汤（芍药、归尾、黄芩、黄连、大黄、木香、槟榔、肉桂、炙草），允占丈人之吉。

及其归宿，郁则为热，试诊其脉，未有不数者，所以香连丸（黄连二十两，吴萸十两同炒，木香四两八钱，不见火，共研末，醋糊为丸）为治痢之总方。

顾在表忌用者，邪犹未入于里也。久病难用者，恐重伤其生气也。昔赵养葵以六味地黄汤治伤寒，人讥为赵氏之创见。而下多伤阴。余尝以六味汤治痢，此又余之创见也。

如果脉虚自汗，赤白将尽，真人养脏汤（粟壳、诃子、肉豆蔻、木香、肉桂、人参、白术、当归、白芍、甘草，寒甚加附子，一方无当归），诃子散（粟壳、诃子、干姜、陈皮，为末，空心服），俱可斟酌而用之。


夫痢不分赤白，既出于热，翻服辛热而愈者（附子、肉桂、干姜、焦术、砂仁、炙草），此乃从治之法。

盖人之禀赋，有寒有热，邪热之中人，每从其类而化，辛热药能开郁解结，使气血得以宣通，特宜于以寒化热之人。若遇以热化热而误用之，其祸将不可胜言矣。存心济世者，倘遇以寒化热之痢，用温补而大获其效，慎毋执以为例。

【解】

痢——热、燥、湿，汇于一时，三气凑而为病。

脉——脉数——郁则为热
脉虚——赤白将近



疟疾脉论

儒者读书一年，穷理十年，自谓于医，已通三昧。及其视病，两相齟齬，不归责药肆之假，便诿咎染病之真，与之强辩，无庸也，请试之治疟。夫疟病之浅而显者也，最易足以验医之得失。世之用劫药而侥幸以其功者，不在此论。

如果堂堂之阵，正正之师，而百战百胜焉，庶可悬壶都市（《后汉书》：黄长房者，汝南人也，为市椽，市中有老翁卖药，悬一壶于肆头，及市罢，辄跳入壶中。市人莫之见，惟长房于楼上观之，异焉。因往再拜，翁乃与俱入壶中。惟见玉堂严丽，旨酒甘肴，盈衍其中，共饮毕而出。后乃就楼上候长房曰：“我神仙中人，以过见责，今事毕当去”），负笼乡邦。犹是投之罔效，屡易其方，古籍牴牾，空披万卷，寒窗灯案，辜负十年。

《经》曰：“邪气客于风府，循膂而下（背脊骨两旁曰膂，并顶骨三椎，至尾骶骨二十四椎），其气上行（由尾骶骨上行），九日出于缺盆（肩下横骨陷中）”。余读经文，而知疟脉之所以弦也。躯壳之内，脏腑之外，属半表半里，而邪居之，宜脉之弦，与少阳同。是故风无常府，以所中处为

府。

其中顶骨也，三阳之脉皆上于头，阳明之脉循发际至额颅，邪气并于阳明，令人头痛，洒淅寒甚，久乃热，则为阳明之疟。少阳之脉，上抵头角，下耳后，邪气并于少阳，令人头痛，寒不甚，热不甚，恶见人，则为少阳之疟。至于太阳之脉，从巅入络脑，还出别下项，正过风府处，故头痛，腰痛，体重，寒从背起。所以中于阳者，太阳之疟居多。

其中骺骨也，三阴之脉皆发于足。太阴之脉上膝股，内入腹，邪气并入太阴，令人足软，不嗜饮食，多寒热，则为太阴之疟。厥阴之脉入毛中，绕阴器，邪气并入厥阴，令人足软，小腹满，小便不利，则为厥阴之疟。至于少阴之脉，上股后廉直贯膂，正当风府处，故足软，呕吐甚，多寒热，热多寒少。所以中于阴者，少阴之疟居多。

其中于阳也，阳气渐入于阴分，日下一节，其行也迟，故其作也，日晏一日，难愈。

其中于阴也，阴气转入阳分，日上二节，其行也速，故其作也，日早一日，易愈。

治之之法，疟在三阳，则以三阳治之。阳明经症：葛根、升麻、黄芩、芍药、草果、炙草、姜枣引。

阳明腑症：大黄、芒硝、槟榔、厚朴、炙草、姜枣引。

少阳症，青皮饮：青皮、厚朴、柴胡、黄芩、法夏、云苓、白术、草果、炙草、姜枣引。

太阳经症：麻黄、桂枝、杏仁、炙草、姜枣引。

太阳腑症：焦术、茯苓、猪苓、桂枝、泽泻、草果、炙草、姜枣引。


疟在三阴，则以三阴治之。

附子理中汤加草果统治三阴：玉竹、焦术、干姜、草果、炙草、附片、姜枣引。

倘弦化脉虚有汗，但辅其正气而邪自除，则统阴阳而温补之（经验方：黄芪、焦术、附子、首乌、当归、玉竹、草果、云苓、炙草、姜枣引），未有不随手而效者。

《机要》曰：“疟有中三阳者，有中三阴者，其症各殊，同《伤寒论》，知治伤寒，则知治疟”。余谓第知治伤寒，犹不足以治疟。知伤寒矣，而知邪客风府，则足以治疟矣。所同于伤寒者，症。所异于伤寒者，脉。伤寒之脉，随阴阳变迁。疟症之脉，一弦字贯彻。知所以治伤寒，而于阴阳胜复之理，邪正交战之时，脏腑行经之穴，无不灼知之矣。业医者，欲验一己之功修，请自试之治疟。

【解】



伤风脉论

六淫以风为首，人触之伤风，憎寒，壮热，头痛，身痛，呕吐，口渴，脉浮而数。张元素羌活汤（羌活、防风、黄芩、白芷、川芎、苍术、细辛、生地、炙草、姜葱枣引），不犯三阳禁忌，俗称治伤风神方。且冬可以治寒，春可以治温，夏可以治热，秋可以治湿，为诸路之应兵。但夏月伤暑，脉虚身热，在所禁耳。旅店山居，医难卒办者，皆可自

检其方而用之。

论未竣，客有笑于旁者曰：“世当叔季，元气衰薄，虽伤风亦当用补，岂可概以羌活汤为治外感之总剂乎？”余勃然曰：君言时当叔季，对洪荒而言，在岐黄撰写《灵》、《素》二经，已言叔季，何况今日。至所言元气衰薄，谬亦甚矣。欲知今时，当归已往。

孔子删书，断自唐虞，唐虞以前，无论已。儒者侈言夏后殷周之盛。夏都安邑，四百四十一年，历年多者，仅见一二，商都于亳，六百四十四年，历年多者，仅见一二，周都丰镐，八百七十四年，视夏商之元气较厚，武王九十三，穆王百有四岁。信史艳称而长寿者，尚不止二君，以及柱下史漆园叟关令尹王子晋接踵而生，三代之元气如是云云。经嬴秦二世，耗散殆尽。西汉都于长安，二百十有三年，高祖五十三，武帝七十一，余无五十之寿。东汉都于洛阳，一百九十六年，光武六十三，明帝四十八，余无四十之寿。

犹幸以寿名世者，黄石公、赤松子、东方朔、魏伯阳，有数可纪。

自汉末历魏晋五代，元气衰薄极矣，四百余年中，在位一二年居多，享寿一二十过半。

迄唐大统归一，元气方转，二百八十九年，君之五十余岁者，犹数数见。为之臣者，许旌阳、孙思邈、钟离汉、吕岩类，皆以寿称。

由后梁五代，以至宋、元、明，元气之寢衰矣。七百余年中，位无五十年，寿少五十岁。其时若陈抟、张平叔、冷谦、周颠而外，寿不概见。

历代元气，彰彰可考，天运循环，无往不复。逮及我

朝，元气大转。以一万八百年为一時計之，尧舜在中天之初，距今四千余年，今正当中天之中。膺彼苍之眷顾，代见圣人之生。钟维岳之精灵，世征仁者之寿。贞元会合，间气浑涵。涤环宇之妖氛，宏开寿域。跻斯民于浑噩，普乐春台。雨时暘若，海宴河清。五星联珠，两曜合璧。一时应运生者，相皆耄耋，人率期颐。

广洛浦之耆英（《宋史》：文路公彦博，结洛阳社，惟司马温公光，年未七十，其余俱八十、九十老人，谓之洛社耆英会），屡屡开千叟之宴。

集香山之人瑞（潜确《类书》：白乐天年七十，以刑部尚书致仕，自号香山居士，会老年宴集于履道里，合之得九人，皆年高致仕者，人慕之，绘为九老图），在在建百岁之坊。

余家世居邵邑，资水之湄，龙山之麓，同时百岁者五人。水之北，卢老、罗老，一妇归黄。山之南，一妇归吕，一妇氏唐。而八十、九十者，指不胜数。一武庠（石辑五），年已八十矣，弓著六钧，矢穿七札，演剧犹作小旦之音。

即吾门一领青衿，相传五代（高祖谥直公，册名周应京。曾祖元恺公，册名周士隼。祖存仁公，册名周良阶。父诞登，册名周道岸），俱年逾八十，详于乘册。外祖（黄正礼）九十七，在黉门八十有三。母舅（黄文铎）九十三，为孝廉，六十余二。

“世上难逢百岁人”，古人语也，想古来百岁最难见，以今观之，当易之曰：“世上随逢百岁人”。“人生七十古来稀”，唐人诗也，想唐时，七十岁者亦稀有。今观之，当易之曰：“人生七十世间多”。

元气之足，禀赋之厚，三代以来，未有如我朝之盛者。治病者亦惟率由旧章焉耳，伤风漫云补乎哉。

【解】

伤风——脉浮数

治——张元素羌活汤：治伤风神方，四季可用，惟夏月伤暑脉虚身热禁

伤寒脉论

《伤寒》一书，后汉张机所著，发明《内经》奥旨，启万世之章程，为医门秘诀。其文佶屈，其义突兀，其方简峭而警辟。有志集注，适有养胎之举，托迹昭潭（莲源黄德安，同里旧交，主于其家，怱怱著论，力救时世），客舍清闲，窃举茅庐诵读时所心得者，提要成篇，姑以简略（携稿诣省垣，衡邑成子凝秀，故人新吾子也，随膳真以补前刻）。

《经》曰：“伤寒一日，巨阳受之”（一日，一次也，不以日数拘。巨阳，太阳也。太阳，经也，膀胱，腑也。经脉从巅络脑，夹脊抵腰，受之，受其邪也）。时值霁发栗冽，有寒有风（寒为阴邪，伤营。风为寒邪，伤卫）。其中风也，经先受其风，桂枝症（不以病名病，而以药名病者，重乎其药也），脉浮而缓，头痛项强而恶寒（有风不皆无寒），过时即热，有汗，鼻鸣而恶风。倘消渴而小便不利，邪入膀胱腑之卫分矣，五苓散主之。其中寒也，经先受其寒，麻黄症，脉浮而紧，体痛（统头痛、身痛、腰痛、骨节疼痛而言），呕逆而恶寒，历时方热，无汗喘满而恶风（有寒不皆无风），

倘如狂（淤热冲心）而小腹急结（淤热不行），邪入膀胱之营分矣，桃仁承气汤主之。大青龙汤治风寒两中经而烦躁（寒郁于外，热蒸于内，阴阳攻击），小青龙汤治风寒两中府之干呕（小便不利，心下有水气，干呕，或兼咳，兼渴，兼噎，兼喘）。

中风经症：桂枝汤（桂枝、芍药、甘草、生姜、大枣。服已须臾，饮热稀粥以助药力，温覆一时许，取微汗。发汗遂漏不止，恶风，小便难，四肢微急，难以屈伸，桂枝汤加附子。发汗后而喘，麻黄、杏仁、甘草、石膏）。

中风府症：五苓散（猪苓、茯苓、泽泻、白术、肉桂）。

中寒经症：麻黄汤（麻黄、桂枝、杏仁、甘草，温服覆取汗。发汗不解，反恶寒者，虚故也，芍药、炙草、附子，三味温服。发汗后身疼痛，脉沉迟者，桂枝、生姜、人参、芍药、甘草、大枣。发汗过多，叉手冒心，心下悸欲得按者，桂枝、炙草，二味煮去滓顿服。未经汗下，脉沉，当温其里，宜四逆汤：附子、干姜、炙草。未经汗下，心悸而烦者，小建中汤：桂枝、芍药、炙甘草、生姜、饴糖）。

中寒府症：桃仁承气汤（桃仁、桂枝、大黄、芒硝、炙草。发汗，若下之，懊恼不得眠，胸中窒碍者，栀子十四枚，香豉四合，煮去滓温服，得吐则止。大下后，恶寒痞结，桂枝汤先解恶寒，大黄、黄连，二味煮去滓，温服以攻痞。心下痞而复恶寒汗出者，附子泻心汤：大黄、黄连、黄芩、附子）。

风寒两中经症：大青龙汤（麻黄、桂枝、炙草、杏仁、生姜、大枣、石膏）。

风寒两中府症：小青龙汤（麻黄、芍药、五味子、甘

草、干姜、半夏、桂枝、细辛。渴去半夏加瓜蒌，噎去麻黄加附子。小便不利，小腹满，去麻黄加茯苓。喘去麻黄，加杏仁。发汗，若下之，病仍不解，烦躁者，茯苓四逆汤主之：茯苓、人参、炙草、干姜、附子）。

“二日阳明受之”（阳明，经也。胃，府也。经脉起鼻额，循鼻外，系目系）。“居戊土之乡，原禀坤静，摄离火之篆（阳明纯热），反揽乾纲。脉浮而大，烦渴目痛，鼻干不得眠者，阳明经病也。脉浮而实，潮热谵语，腹满，大便硬者，胃家府病也。经病治以白虎汤，府病治以三承气汤，其为正阳明则然。六经虽分阴阳，而宰之者阳明，为六经之所朝宗，即为六经之所归宿。三阳有类聚之条，三阴有转属之症。太阳阳明，不更衣（不大便）而无所苦（脾约丸）。少阳阳明，时烦躁而大便难（以法治之），大实腹痛，阳明杂见太阳之篇（桂枝大黄汤）。土燥水干，阳明混入少阴之类（急下之）。脉滑而厥（里有热，白虎汤），厥阴中亦有阳明。随经而见，妙蕴无方。

阳明经症：白虎汤（石膏、粳米、知母、炙草）。附录：钱仲阳葛根汤（葛根、升麻、白芷、炙草、大枣、生姜）。

阳明府症：三承气汤（汗吐下后微烦，小便数，大便硬，小承气汤：大黄、厚朴、枳实。腹胀满，调胃承气汤：大黄、炙草、芒硝。不大便，发热汗多，大承气汤：大黄、厚朴、枳实、芒硝。太阳阳明，脉浮而涩，麻仁脾约丸：麻仁、芍药、枳实、大黄、厚朴、杏仁。少阳阳明，以法治之，相胃家虚实加减。下，桂枝大黄汤，见后。少阳急下之，大承气汤）。

备录阳明症方（身黄如橘子色，小便不利，茵陈蒿汤：

大黄、茵陈、栀子，身黄发热，栀子、黄柏、炙草）。

“三日少阳受之”（少阳，经也，胆，府也，经脉循胁络耳），兼木火之德（属甲木，寄相火），司出入之门（入太阳，出太阴），邪犯经，胸满胁痛而耳聋。邪犯府，口苦（胆热上蒸），呕逆（胆热上冲）而目眩（胆热上熏）。脉之大者，变而为弦，症之热者，转而似疟。居阴阳之界（半表半里），通阴通阳。无汗下之方，禁汗禁下。邪正相持，进退互拒，小柴胡汤为和解少阳之统剂。而其变则有辨焉者。呕逆（胆热）而腹痛（胃寒），黄连汤分理阴阳。呕吐而硬（胃实）烦（郁热），大柴胡汤双清表里。宜应手而解，方上勿藉口于和为套。

小柴胡汤（柴胡、黄芩、人参、法夏、炙草、生姜、大枣。胸中满而下呕，去法夏、人参，加瓜蒌仁。渴去法夏，加人参、花粉。腹痛去黄芩，加芍药。心下悸，小便不利，去黄芩，加茯苓），黄连汤（黄连、炙草、干姜、人参、桂枝、半夏、大枣），大柴胡汤（柴胡、半夏、枳实、大黄、黄芩、芍药、生姜、大枣）。备录少阳症方（胸胁微结，小便不利，柴胡、桂枝、干姜、花粉、黄芩、牡蛎、炙草。服柴胡汤已，反渴，以阳明治）。

“四日太阴受之”（太阴，经也。脾，脏也。经脉布胃中，络于嗌。邪入阴分，经脏齐病）。阴阳变态之妙，有不见其朕兆。阳邪入阴，尺寸皆沉。腹满吐食自利，有腹满时痛之寒症（理中丸），即有腹满实痛之热症（桂枝汤加大黄），有得食缓吐之寒症（理中丸通治），即有得食即吐之热症（干姜黄连汤）有自利不渴当温之寒症（理中丸通治），即有自利腐秽当下之热症（大承气汤）。

盖人之形有厚薄，气有盛衰，脏有本寒本热，每从赋禀以为转移。如必以直中为寒，传经为热，其何解仲景寒热并论，列于四日。

理中丸（人参、白术、炙草、干姜，捣碎蜜和为丸，如龙眼大，以沸汤和一丸，研碎温服），干姜黄连汤（干姜、黄连、人参）。

“五日少阴受之”（少阴，经也。肾，脏也。经脉系舌本）。生人之命蒂安危系于少阴。病则脉细欲寐，自利发厥（手足冷曰厥），口干舌燥，渴欲饮水自救，无奈水火同宫，辨别最宜分晓。挟水为动，则为阴邪。挟火而动，则为阳邪。阴邪脉沉细而迟。阳邪脉沉细而数。阴邪但欲寐，身无热。阳邪虽欲寐，心多烦。阴邪下利清谷，阳邪下利清水。阴邪面赤而里寒，小便白。阳邪手足厥而里热，小便赤。阴邪口干舌燥而带和，阳邪口干舌燥而致裂。阴邪渴欲饮热水以自救，阳邪渴欲饮温水以自救。临症审视，只争芒芴。

寒症方：（身体痛，附子汤：附子、茯苓、人参、白术、芍药，四逆汤通治：炙草、干姜、附子。下利，白通汤：葱白、干姜、附子。手足冷，烦躁欲死，吴茱萸汤：吴茱萸、人参、生姜、大枣）。

热症方：（心烦不卧，黄连汤：黄芩、黄连、芍药、鸡子黄、阿胶。咽痛，甘桔汤：甘草、桔梗。口烂咽干，大承气汤。自利清水，色纯青，心痛，口干，大承气汤）。

“六日厥阴受之”（厥阴，经也，肝，脏也，经脉绕阴哭，抵小腹，贯心膈）。传经而至厥阴，在时为丑，在岁为冬，在卦为坤。脉细肢厥（厥，逆也，四肢以温为顺，以冷为逆），烦渴囊缩，症则犹是也。而治法悬绝。漏尽更残，

四望阴霾，而有纯寒无热之症。天寒地冻，满腹阳春，而有纯热无寒之症。阴凝于阳必战，其血元黄，而有阴阳错杂之症。彼纯寒而厥，当归四逆汤，夫人而知之。热愈深，厥愈深，纯热之厥甚于纯寒，非急下不足以救水，医将何以决之（脉数、咽干、小便赤）？而况阴阳错杂者之眩人耳目乎？当此阴尽阳回，晦朔交卸之时，仲景立乌梅丸以安蛔，其实统阴阳而治。医而知治厥阴，医道其庶几乎。

纯寒症（当归四逆汤：当归、桂枝、芍药、细辛、通草、甘草、大枣。下利清谷，里寒外热，汗出而厥者，通脉四逆汤）。

纯热症：（急下，大承气汤）。

阴阳错杂症：乌梅丸：乌梅三百枚，细辛六两，干姜十两，黄连十六两，当归四两，附子六两，蜀椒四两，桂枝六两，人参六两，黄柏六两，右十味，异捣筛，合治之，以苦酒渍乌梅一宿，去核，蒸之五升米下，饭熟捣成泥，和药令相得，纳臼中与蜜杵二千下，丸如梧桐子大，先食饮服十丸，日三服，稍加至二十丸，禁生冷、滑物、臭食等。


备录：（脉滑而厥，里有热，白虎汤）。


夫三阴三阳，班班可考，而有治表里急，治里表急，阴同乎阳，为两感（太阳少阴同病，阳明太阴同病，少阳厥阴同病）。余读《经》文莫治，仲景无方，不禁恍然三叹焉。窃意表重于里者，以里为主，稍解其表。里重于表者，纯治其里。管窥之见，不敢告人。壮游四方，而以此法活人居多。偶检李梴《伤寒论阅》，亦有是说。余生也晚，安敢并驾古人？不谓理之所在，古今人所见有略同也。岐伯、仲景，有知其将许我友李梴为徒乎？若世所传大羌活汤则吐弃

之矣。至于合病、并病、坏病、劳复、食复、饮酒复、阴易、阳易、阴阳易，六经精透，举而措之裕如。一百一十三方，采方总撮要领，三百九十七法，注法悉本原文。

练就长沙（仲景为长沙太守，人称张长沙）之明珠，化作涅槃（佛说法处，《金刚经》：“入涅槃而灭度之”）之舍利（释加牟尼珠名舍利子）。

【解】





瘟疫脉论

春温，夏热，秋凉，冬寒，乃天地之正气，人感之而病者，为正病。久旱亢暘，淫霖苦潦（《洪范》：“一极备，凶；一极无，凶”，注：极备，过多也。极无，过少也。唐孔氏曰：“雨多则涝，雨少则旱。是极备亦凶，极无亦凶”），雨暘寒燠之不得其正者，为四时之沴气。

气轮岁会（五运甲己化土，乙庚化金，丙辛化水，丁壬

化木，戊癸化火。土运临辰戌丑未，金运临申酉，水运临亥子，木运临寅卯，火运临巳午，运气与地支年辰相会，故曰岁会）。

运值天符（六气，子午之岁，少阴火司天，阳明金在泉。卯酉之岁，阳明金司天，少阴火在泉。丑未之岁，太阴土司天，太阳水在泉。辰戌之岁，太阳水司天，太阴土在泉。寅申之岁，少阴相火司天，厥阴木在泉。巳亥之岁，厥阴木司天，少阴火在泉。

大寒至小暑，司天主之，大暑至小寒，在泉主之。

火运之岁，上见少阳。土运之岁，上见太阴。金运之岁，上见阳明。水运之岁，上见太阳。木运之岁，上见厥阴。岁运与天合，故曰天符）。

水火木金之各据其偏者，为八方之厉气。合厉与沴，酿而为毒，人感之而病者，为瘟疫，杂见于四时。在春，谓之春瘟。在夏，为之热病。在秋，谓之晚发（痢亦名晚发）。在冬，谓之寒疫。

《内经》著于岐伯，爰详五疫之文（《内经·刺法论》帝曰：“余闻五疫之至，皆相染易，无问大小，病状相似，不施救疗，如何可得不相移易者？”

岐伯曰：“不相染者，正气内存，邪不可干。避其毒气，天牝从来，复得其往，气出于脑，即不干邪，气出于脑，即先想心如日。欲将入于疫室，先想得青气自肝而出，左行于东，化作林木。次想白气自肺而出，右行于西，化作戈甲。次想赤气自心而出，南行于上，化作焰明。次想黑气自肾而出，北行于下，化作水。次想黄气自脾而出，存于中央，化作土。五气护身之毕，以想头上如北斗之煌煌，然后可入于



疫室”）。

周礼掌于方相，聿严逐瘟之令（《周礼》：方相氏掌蒙熊皮，黄金四目，衣朱裳，执戈扬盾，帅百隶而时傩，以索室驱疫。

《曲礼》：季冬，大傩月令，九门磔攘尼山，于乡人行傩。朝服而立阼阶，皆古圣节，宣燮理之义，故民无夭折，得以嬉游于光天化日之宇，诚盛事也。后世踵而行之，由是生养斯民之至意。方书之逐瘟者，其立心亦如是，良相良医合为一手）。

其为瘟也，称名攸异，大头瘟、软脚瘟、虾蟆瘟、疙瘩瘟。其为斑也，形容各殊，赤霞斑，紫金斑、绿云斑、黑砂斑。互相传染，大小相似。

初起，邪客于募原（《难经·六十七难》注：五脏之募，皆在腹。五脏之腧，皆在背。原即腧之根本。募原，躯壳之里，经脉所系之处），头微痛，或不痛，微恶寒，或不寒，但一于热，脉数无伦，沉沉默默，到夜尤甚。

郁遏之极，邪从表出，谓之外溃，或大汗鼻血，随汗与血而解。若邪侵胃腑，则内溃矣。泻则完谷不化，结则坚硬如石，胃枯肠腐，舌里唇青，无所不至。

是为天地之毒气，常以肃杀而为心。激一己之心肺肝肠，魂飞魄走，捧心憔悴之形，愁云遍野。环四境之乡闾里党，鬼哭神号，满目凄凉之色，毒雾蔽空。惟不知其毒而妄治之，盈城盈野，死于非命。知其毒而善调之，沿门沿户，立起沉疴。

其在未溃之初，毒犹盘踞募原，驱伏魔，全凭草果，破坚垒，须藉槟榔（吴又可达原饮：槟榔、草果、厚朴、知

母、芍药、炙草、黄芩。嘉靖己未，江淮大疫，用败毒散倍人参，去前胡、独活，服者尽效。万历己未大疫，用本方复效。大抵毒在募原，加参于表剂，元气不因表而受伤。以表剂而加参，毒气不藉参而助疟。与达原饮用知母、芍药同参。至于内溃。两方俱无用矣，惟有一下再下之法）。

毒而外溃，渐杀其势矣，即贝母，柴胡，可以和其事（经验方：柴胡、生地、贝母、黄芩、银花、生甘草、茅根引）。

毒而内溃，愈纵其悍矣，非芒硝、大黄，奚能奏其功（经验方：芒硝、大黄、槟榔、厚朴、枳实、炙草、姜枣引，下以毒尽为度）。

知斯三门，病于遁形，设方攻毒，妙在一心（三门：初中募原，外溃，内溃，精透三门之奥，不过借达原饮、经验方之榜样。道人自瓶钵以来，所以省垣，郡邑，遇是症，可以盈箱）。

夫瘟疫乃四时不正之气，温乃四时之正气，性命攸关，最宜分别。

景岳《瘟疫门》中，抄写温病及伤寒之经文，杂凑成章，毒害苍生者，莫此书为甚。

阳犯医门之刑（喻嘉言著《医门法律》），擢发难数。阴设海底之狱，阿鼻难逃（铁铤铭注：大海之底，有五名焦沃，纵横八万四千里，厚二万里，下有八大地狱，八名阿鼻地狱）。


若吴又可，其于瘟疫，根源虽未必解透（细阅吴又可《瘟疫论》，从《内经·疟论》“邪气客于风府，横连募原”悟出。其撰之方，即从前人截疟方化裁，真千古慧人也，至

其所论伤寒少而瘟疫多，世医执其说，凡偶感风寒，便曰瘟疫。一言之误，贻祸千秋），而其治法，极为精微，刘李朱张下，实为岐黄功臣。

【解】

春温，夏热，秋凉，冬寒——天地之正气，人感而病为正病。

瘟疫——四时不正之气：水火木金各据其偏，八方之厉气，感而病为瘟。



室女脉数反吉论

小儿纯阳，脉常有六七至，甚有八九至者。室女血盛，脉上鱼际，亦常有六七至者。《脉经》但言脉上鱼际，而不言数。余尝见上鱼际之脉，未有不数者。盖脉即血也，血盛则脉长而洪。血衰则脉短而涩。

室女贞元未亏，血海充满，其脉之数，亦固其所。但得娇姿艳丽，体态轻盈，谓之无病，可以勿药。惟是兰闺寂寞，纱窗月静，绣幙风清，时觉气体不安，延医调治，但见其脉数而以为病，则误矣。

《脉经》曰：“脉数，惟有儿童作吉看”，余即补之曰：“脉数，室女亦应作吉看”。

【解】

室女脉数——吉，贞元未亏，血海充盛。

月 经 脉 论

坤，顺德也，配乎乾，则万物化醇。女，阴象也，从乎阳，则万物化生。《图·书》以七为少阳之数，逢阳则化，故七月生齿，七岁毁齿，二七十四而天癸至。是乃先天一点真阳之水，《易》所谓男女媾精，《礼》所谓一阳来复，水泉始动者，此物此志也。

积四千八百之期，合一大藏经，于以充于中而溢于外。其象上应乎月，三五而盈，三五而缺，周三十日而旋转如环，故称经焉。

经者，正也，正直无私。经者，常也，经常不变。本坤之德，应月之精，以生男生女，原生生于不已。乃或为药餌所伤，或以忧思而伤，孰为不及期，孰为过期，在前在后，无所不至矣。夫不及期为热，过期为寒，此其常也。亦有不及期为寒，过期为热者，总分于迟数虚实之脉而已矣。

其为药餌伤也，过服寒凉，弊为淤阏。过服温补，备见沸腾。

盖血，阴也，喜静而恶燥，静则培养，燥则消亡。尝见膏粱之家，未有妄服寒凉者。火郁至极，不得已而斟酌服之，在医士擅长半属温补之方。

胡为闺居气滞，本非虚也，而以为脾虚，辄予以黄芪、白术。闲坐寒生，本无寒也，而以为命门不足，辄予以附子、干姜。至煎熬之极，或血因火动，一月数行。或血为火灼，数月一行。诎知不及期与过期之俱关于药乎？

其为忧思伤也，心地安舒，应期而至。心地抑郁，愆期

而来。盖血，营也，好聚而恶散，聚则充周，散则奔突。纵观闾阎之众，未有不乐安舒者。暴怒频加，不期然而忧闷攻之。彼女子善怀，本多抑郁之隐，甚至掣肘于翁姑，致血上溢，非有余也。而以为血满。罔顾其衅起勃谿，反目于夫婿，致血横行，非不足也。而以为血亏，罔顾其悲由葑菲，至郁积日久，或稍如其意，行则后期。或仍拂其意，行则前期，讵知前期与后期之皆系于忧乎？由是观之，伤于忧思而无子者，顺其心，养其神，犹可挽回。伤于药饵而无子者，诵其经，祷其佛，难以救复。


盖天地之大德曰生，而鼓其生机者，和风以散之，迟日以暄之，雨露滋培，土膏润泽，自然生意婆娑。一经炎风之煽，烈日之焚，土脉焦枯，英华何由发越？天地犹是也，而生机倦矣。

人得天地之生以为生，而畅其生机者，静摄乃气，调和乃血，阴阳交错，子宫温暖，自觉生育绵延，一经燥热之侵，辛温之耗，血元羞涩，胚胎奚自结凝？人则犹是也，而生机绝矣。

道人一瓢一笠，云游以来，见艰于嗣息求治者，盈门拥案。及阅前所服之药。无非温补之药，询前所延之医。无非温补之医，比比皆然，令人万不可解。顾考其服药之初，亦觉与温补相宜，气体庞然而丰隆也，姿态嫣然，而明媚也，饮食纷然而并进也。

医之用药，即此历之阶耳。惟是瓦积之场，不堪黍植。块存之体，安望熊占？所愿兰房淑媛，绣阁名姝，体坤之道，顺月之恒，勿贪药饵，惟荷幽闲，以副天地好生之德，庶道人救世婆心，亦不至诋为饶舌耳。

【解】



月经——过期、先期——忧思抑郁伤。

胎前全凭脉论

凭脉为的治病，而至胎前，其看症也，历历录录，其用药也离离奇奇。黄芪，安胎者也。乌头，伤胎者也。而胎当其寒结，黄芩转为伤胎之鸩血，乌头又为安胎之灵丹（明党、焦术、砂仁、附片、建姜、当归、炙草）。

焦术，安胎者也。芒硝，伤胎者也。而胎当热结，焦术反为伤胎之砒霜，芒硝又为安胎之妙品（芒硝五钱，滚水澄去滓，调蜜服）。

当此两命相关，以安为伤，以伤为安，而用之裕如者，夫亦曰权脉之迟结数促耳。胆从脉出，而胆斯大，智从脉生，而智斯圆。无药不可以安胎，无药不可以伤胎，有何一定之方，有何一定之药也乎？彼《本草》之注禁服，不过为初导之先路。

夫胎症，其显者也。由胎症而推，脉清而用得当，信石蜈蚣，无非参苓芪术。脉溷而用失其当，参苓芪术，无非信石蜈蚣。

拘成见者，赵括读父书而丧师，荆公用周礼而乱宋。知

变化者，孔明添灶而退兵，楚王破釜而取胜。古今来，英雄成败，只争此一心之妙用，又何恤乎人言。

【解】

胎前凭脉用药——
 择药——凭脉象：胆从脉出
 辨证——凭脉象：智从脉生

产后不凭脉论


百脉空虚，瘀血留滞，二语足以括尽产后诸病。其用药也，补则足以填空虚，温则足以散瘀滞。温补二字，在产后极为稳当，而见之于脉，则未可以一格拘也。有迟涩者，有沉细者，有洪数者，有弦紧者。迟涩沉细，可温可补，若洪数弦紧，故可漫无区别，而一于温之补之乎。抑知瘀血填塞隧道，血脉为之沸腾，虚寒之体，转化为实热之脉，倘凭脉以疗病，则为发为泄，为汗为凉。病症百端，药餌肆应，非不经营惨淡，竭力弥缝，乃一病未已，一病旋生，卒至温补难施，不可救药，岂非专凭脉者，阶之厉耶。

余家世传《月科》一卷之书，得之本邑王定所。不诊脉，但问症。细阅书中，实是肚腹大胀大痛者，先治之以去瘀之本（桃仁、归尾、延胡索、灵脂、干姜、川芎、荆芥穗，酒调服）。其于症之虚寒者，固不外肉桂、干姜（茯苓、炙草、当归、川芎、焦白术、肉桂、蜜黄芪、干姜）。即症之大热者，亦不离肉桂、干姜。百试百验，世无产难之妇，远近求药者，日踵其门。

传至于余，参究脉理，思欲突过前人。乃凭脉罔效，凭书辄效。而后知产后凭脉，其理犹浅，不凭脉，其理方深。

世之家藏秘本，粗视之，了无意义，而用之多效者，大半类此。

【解】



小儿疳脉论

道人于圣学，本无所窥，而少者怀之，雅有同志。窃于疳症，三致意焉。十六岁以后，谓之癆，十六岁以前，谓之疳。其证头皮枯涩，毛发焦稀，腮缩鼻干，脊耸体削，斗牙咬甲，烦渴自汗，口鼻潮赤，肚胀潮热，酷嗜瓜果、泥炭等物，外则肢体生疮，是其候也。

疳之纲领有五：脾肺心肝肾。至于条目，不可穷纪，姑举其要，曰脊疳，曰蛔疳，曰丁奚疳，曰无辜疳，曰哺露疳，名有百端，理惟一致，惟见症不同，不外热、积、虫三者而已。

考古名方，有塌气丸、龙胆汤、芦荟丸、木香丸、胡黄连丸及各种肥儿丸。其理正，其义深，其效神，信非仙家莫传。因方书论症支吾，虽传其方，无人敢用。如景岳论中，其或气血两虚，有非大补不可，固属门外之揣摩。即钱仲阳小儿科中一代名医，而以为皆因脾胃虚损，亦是老生常谈，与疳症何涉？钱氏如此，其他可知。

道人不惜苦口饶舌，细为分析，病源既明，则作方者之

苦心，庶得以阐明于世。杨氏曰：“瘡者，干也。”道人则曰：“瘡者，甘也”，因奉养太过，肥甘之味，郁而为热，蒸而生虫，久而成积，而瘡以是名焉。惟其为热，煎熬津液，肌肉为之消削。惟其成积，肚腹胀大，饮食为之减少。惟其生虫，吮脏腑，则偏嗜异物，蚀肢体，则疮痒不痛，种种症候。大半得之膏粱之家，饫黍藜者，十居一二。

道人云游以来，每见朱门子弟，反不如居茅屋者之神完气足。总由饮食不节之故，何关乎元气之胜衰，脾胃之强弱。此其大彰明较著者也。

名方中不离黄连为君者，解其煎熬之热毒也。用芦荟、生地、山梔、青黛、胆草、黄柏者，清其火也。用芫荇、君子、川楝、雷丸、鹤虱、乌梅者，杀其虫也。用莪术、神曲、山楂、麦芽、青皮、木香者，消其积也。用干虾蟆、蟾酥者，以毒攻其毒也。用夜明砂、灵脂者，去瘀而生新也。有是症则有是药，性味之寒与毒，夫复何疑。

尝见患是症者，请一目不识丁之医，或揣之曰：“莫不是瘡？”将师所传治瘡之方，遂撮一贴，犹或倖中。彼原不知黄连之寒，芫荇之毒。

请一读书明理之医，明知是瘡，开口便曰：“脾胃大亏，非峻补不可。枯瘦之躯，何堪此黄连之寒，芫荇之毒”。

主人曰：“稳当”。不知热得补而益炽，积得补而益坚，虫得补而更多。至于不救，则曰“有命”。此非读书之过，不善读书者之过也。道高一尺，魔高一丈，其是之谓欤？然则，非攻热，积、虫，遂可以治瘡乎？非也。五瘡有所见之症，诸瘡又各有所见之症，变化生心，岂可胶柱鼓瑟。不过胸有成竹，而后能画竹。

然则，治疳一于攻，而全无补法乎？亦非也。《经》曰：“大毒治病，十去其六”。相其热退，积减，虫安，穷寇勿追。或调脾理胃，滋肾平肝，一任医之运用。

考古名方：

治腹胀大塌气丸：白豆蔻、麦芽、五灵脂、砂仁、莪术、青皮、陈皮、使君子各二钱，虾蟆三钱，米糊为丸。

下虫丸：苦楝子皮，酒浸焙，贯众、槟榔、桃仁、木香、鹤虱，米糊为丸。

木香丸治疳痢：黄连、木香、厚朴、夜明砂，生姜水为丸。

大茺萸汤，治小儿发热作渴，少食，大便不利，发黄脱落：茺萸、山梔、当归、白术、云苓、柴胡、麻黄、羌活、防风、黄连、黄柏、炙草各二钱。

四味肥儿丸，治小儿食积五疳，目生云翳，牙龈腐烂：茺萸、神曲、麦芽、黄连，等分为末，猪胆汁为丸，绿豆大。

芦荟肥儿丸，治热疳：芦荟、龙胆草、木香、人参、使君子、麦芽各二钱，土鳖去头足酥炙，槟榔、黄连各三钱，茺萸、胡黄连各一钱，猪胆汁为丸，黍米大。

龙胆丸，治疳脑热疮：龙胆草、升麻、苦楝根皮、赤茯苓、防风、芦荟、油发灰、青黛、黄连，炼蜜为丸。

蟾酥丸，治小儿头顶结核，面色黄瘦，饮食不甘，腹大发热：蟾蜍二三个，将粪蛆一勺，置桶中，以尿浸之，即将蟾蜍打死，投与蛆食，一昼夜，用布袋盛起，置急流中一宿取出，瓦上焙干为末，入麝香少许，米为丸。

疑病、诈病脉论

本无病也，而疑之成病，积想成因，悬拟成象，则无病者真以为有病矣。彼疑之，我亦疑之，何以名之为医？本无病也，而诈之为病，困顿其状，呻吟其气，则无病者，真以为有病矣。彼诈焉，我受其诈焉，何以名之为医。而欲使疑者知其为疑。多方以解其疑，而疑者不疑。诈者知其为诈，直言以指其诈，而诈者不诈。亦惟决于脉，视其缓而已矣。

盖有莫解之症，必有莫解之脉，疑则必疑为莫解之症，而何以诊其脉无恙也，其为疑必矣。有莫起之疴，必有莫起之脉，诈则必诈为莫起之疴，而何以诊其脉如常也，其为诈必矣。杯中蛇影，挂弓即解，疑者无所施其疑。灸难分痛，见艾即愈，诈者无所用其诈。精于脉理者，又何疑诈之我欺也哉。

平人脉歇止无妨论

代脉关乎寿，结脉因乎寒，促脉因乎热。

平脉歇止，则不关乎寿与寒热，亦自有说。盖一呼一吸，脉来六寸，血营气卫，息数一万三千五百通，脉行五十度，是为一周。稍为痰气所凝，则脉为之一止。非如代之止有常数，结促之止由迟数而得也。

天地万古不老，而有岁差之数。日有万古长明，而有用食之时。岁差，相食，曾何损于天地日月也哉。

【解】

平脉，有一歇止——稍为痰气所凝，非病。

代脉——止有常数，关乎寿。

结脉——止无常数，寒：迟

促脉——止无定，热：数

纯阴脉症

万物之生，负阴而抱阳，阴阳调和，谓之无病。亦有生来脉旺，谓之纯阳，名曰寿脉，此《脉经》所以言者。有纯阳，则有纯阴，此《脉经》所未言者。

余弱冠时，常至一地，见二妇人，一妇二子，一妇三子，家皆饶裕。余切其脉，按之至骨，丝微欲绝，问其体，一毫无病。过十年，再至其地，二妇之子，皆入胶痒，家亦丰厚。再诊其脉，依然故吾也。过十年，三至其地，一妇之子已登贤书，家更倍于昔日。诊其脉，依然如初也。距今又十有余年矣。二妇白发齐眉，青衿满眼，其发达更有未可料者。《脉经》注纯阳为寿脉，不知纯阴亦为富贵、福寿之脉。

（一妇，梅邑庠生谢裘周德配，孝廉公谢运跃母，钟太孺人也）。

【解】

脉，按至骨，丝微欲绝——体无病：纯阴脉，寿。

内外痈疽先变脉论

平人饮食仍旧，气体如常而脉数者，多发痈疽。

夫外感脉数，骤然而来，饮食为之一变。兹之脉数，何以饮食仍旧也？内伤脉数，由渐而进，气体为之少减，兹之

脉数，何以气体如常也？其为痈疽也，明矣。

发于外者，痈疽并称，后犹可疗。发于内者，但以痈论，务须先知。

凡属肺痈与胃脘诸痈，总是热毒蕴结，四字该之。其先少发寒热，渐隐隐作痛，斯时清其热，解其毒，疏其气（经验方：桔梗、天冬、黄芩、葶苈子五分，当归、生甘草），易易耳。倘辨脉未清，视为他病，万一肺腑能语，则呼冤实属可怜，直待吐脓呕血，而后知焉，则已晚矣。士君子穷理于平日，辨脉于临时，一遇内毒，立剖当前，诚有不必为之试黄豆而验红点者。昔扁鹊视病，窥见脏腑之微结，留心脉学者，安见古今不相及也矣。

（痈疽一症，迄我朝《医宗金鉴》及《证治全生》等书出，前代所不能医者，皆能医之，独涌泉症，不出前代论定。千总刘兰生童穉知交，胶漆友也，患是症，流毒十有余年。未发之前，卜其必发者，验其脉数也。已发之后，断其不死者，验其脉缓也。费尽千金，总难痊愈，游湘三年，不知亦有人能医否，录之以志知己之感）。

【解】

痈疽——热毒蕴结。

痈疽脉数——饮食体气如常。

外感脉数——骤发，饮食变。

内伤脉数——渐进，体气减。

摘平脉三不治症论

天下事之信以为然者，必其理之无不然者也。然仅言其

常然，而弗揭其偶然，非惟无以坚其信，或反益以滋其疑。即如定缓为平脉，是宜无病不瘳，詎知噎膈反胃外，不可治者，又有三焉。

肌肉大脱，九候虽调，不可治者，一也。

病到喘促，脉忽还原，不可治者，二也。

全受而体无病，全归而脉不变，不可治者，三也。

有理外之事，便有理外之理。第恐于理中之理，未能洞悉无疑，斯与理外之理，愈觉昧没而杂。既于理外之理，弗克明辩以晰，遂于理中之理，转至惆怅无凭。

而缓为平脉之说，不几于摭摭陈言，究无主宰乎？爰摘三条，明著于编，使知以缓为宗，滴滴归原允矣。

一经旧德（《汉书》：韦贤以诗书授，七十余为相，少子元成复以明经，历位至丞相。谚曰：“遗子黄金满籝，不如一经”。

沈佺期诗：“一经传旧德”。是编缓为平脉，本《内经》旧德，丝丝入扣，森然五字长城。《唐书》：秦系与刘长卿善为诗赋，权德舆曰：“长卿自以为五字长城，系用偏师攻之，虽老益壮”。

《丹铅总录》：司马景王命虞松作表，再呈不可意，钟会取草为定五字，松悦服，以呈景王，景王曰：“不当尔也”。松曰：“钟会也”。景王曰：“如此可大用”。

沈佺期诗：“五字擢英才”，用此事也，解者以五字为诗，误矣”。

【解】

缓——为平脉，亦偶为病脉。

死 生 章

医者，所以治人之生者也。未知死，焉足以治人之生。实知死之无可救药，则凡稍有一毫之生，自宜多方调治。

欲辨死生，仍归缓字。缓为一身之元气，即为一身之生气。有十分之缓，即有十分之生。有分毫之缓，即有分毫之生。听缓之声，绘缓之象，取缓之魂，追缓之魄，刺缓之骨，缚缓之神，而幽明异路，如在目前。

弹石劈劈而又急，解索散散而无聚，问有分毫之缓乎？曰：无有也（弹石之脉，若坚硬之物击于石上。解索之脉，犹解乱索，指下乍疏乍密）。

雀啄顿来而又往，屋漏将绝而复起，问有分毫之缓乎？曰：无有也（雀啄之脉，犹雀之啄食，连连凑指，且坚且锐，忽往忽来，屋漏之脉，良久一漏）。

虾游冉冉而进退难寻，鱼翔澄澄而迟疑掉尾，犹有分毫之缓乎？曰：无有也（脉已濡细矣，加以十一二至，满指是脉，犹虾之拥于水中，冉冉而进退难寻，脉已沉矣，加以两息一至，犹鱼之在水中，头身贴然不动，而尾良久一掉）。

沸釜之脉涌如羹，一占此脉旦夕死，而缓全无余影矣。修到神仙也无药，世间何处觅医生。

复有绝处逢生，困顿沉沉，声音劣劣，不患脉少而患脉多，不患脉无而患脉有，寸关虽无，尺沉而匀。病到无聊，脉犹有根，仔细栽培，立可回春。

【解】

缓脉——主一身之生气，有一分缓，即有一分生机。

尺脉沉匀——一身之根，病可回。